



了翁一座請大藏及有

家書異上武州紫雲山

我微笑塔院廬中永

為學者不敢許出院內

當山三世鐵牛機謹識

三經同卷

阿育王譬喻經

三慧經

阿毗曇五法行經

B 64853

阿育王譬喻經

失譯人名今附東晉錄

昔有大國王字名阿育統領諸國莫不臣屬大王聰明智慧無量教問諸臣天下頗有不屬我者不諸臣對曰天下盡屬大王無不靡伏中有一智臣對曰王界內不屬王者海中有龍王不屬大王初不遣信亦無貢獻是以知不屬大王王可試之千乘萬騎椎鍾鳴鼓旌旗護擁前後到海邊龍王靜然不出王便呼言汝在我界內所由不出亦寂然不對王王便問智臣何由使龍王得出智臣對曰可使出耳龍王福德甚大以是不肯歸伏大王若不信臣語者等秤二斤金鑄作二像一作王像一作龍王像復取秤之龍王像重大王像輕是以知龍王福德多大王福德少王心甚解歡喜無量普告天下侍養孤老周窮濟乏所在郡縣興立天尊祠及置天尊舍利供養衆僧三年之中復取龍像王像秤之龍像便輕王像便重智臣白王龍可伏矣便設函簿如前後復到海邊龍王化作年少婆羅門於王前長跪問訊起居貢獻海中所有珍奇好寶自稱臣妾率土之民無不歡喜別在經文以示後世人天下多力無過福德人護經法如母

護子豈可不思之
昔天尊在世時將諸弟子教化羣生見地有一昂弟子阿難輒便取之天尊告阿難放地阿難即便放地手便大香小復前行見飄風吹草在地阿難復取天尊語阿難放地手便臭阿難未解須臾前到精舍當問此意阿難白天尊何緣捉昂而手香捉草令手臭天尊語阿難昂本從香地來香著昂是以使汝手香草從臭地來故是以使汝手臭與賢相近如香著昂與惡人相近如臭著草是以經言近賢成智近愚益惑損我者三益我者三此之謂也不可不慎

昔天尊將諸弟子至江邊天尊語弟子取如拳許石擲著水中爲浮爲沒弟子對曰石沒在水底天尊言無有緣故復次有一石辟方三尺著於水上經便度河石亦不濕云何得爾諸弟子未解僉然怪之諸弟子長跪白佛言何緣如此天尊言有善緣故耳何者爲緣船是天尊借爲喻與善師相值者得免衆苦與惡師相值者則習惡事不離衆禍示語後世之人不可不慎

昔有窮寒孤獨老公無以自業遇市得一斧是衆寶之英而不識之持行斫杖賣之以供微命用斧欲盡

見外國治生大賈客名曰薩薄見斧識之便問老公賣此斧不老公言我仰此斧斫杖生活不賣也薩薄復言與公絹百匹何以不賣公謂調已亦不應和薩薄復言何以不見應和與公二百匹公便悵然不樂薩薄復言嫌少當益公何以不樂與公五百匹公便大啼哭言我不恨絹少我愚癡此斧長尺半斫地已盡餘有五寸猶得五百匹是以爲恨耳薩薄復言勿復遺恨今與公千匹即便破券持去此斧衆寶之英耳地博不問多少以斧著上薪火燒之盡成貴寶天等借以爲喻以受人身六情完具聰智辯達當就明

師以求度世之道神通可及而俗著不別真僞者耕犁因放時世取驅至於老死復當受罪喻如老公用寶斧盡豈不悟哉昔龍上一鳥字爲鸚鵡展轉及得在東太山諸禽獸飛鳥莫不敬愛以其在遠來故比作親友甚相愛樂春月野火所燒便行入水飛在火上抖擗毛羽之水救親友難往返非一悲鳴大呼鸚鵡之水豈能滅火至誠感天爲之降雨火卽時得滅天等經借以爲喻賢者以道士遠到研精行道減割身口侵妻子分供養衆僧雖無神通感動亦以至誠燒香求啓使諸檀越獲福無量喻如天雨衆火悉滅

昔有大長者財富無量窖穀千斛後出之不見穀見一小兒可年三歲亦不知語長者亦不知字名何物舉門前大道邊陌上行人儻有識者舍東有一車來乘駕黃牛人著黃衣從人皆黃過見小兒便言穀賊何以坐此是兒五穀之神語長者持鋤斧來我語君一甕金處適始行過者是金神順陌面去得道南廻行二百步道西當有朽故樹其下有甕有十斛金君往掘取可以還君穀直長者卽隨小兒教得此治家足成大富佛經借以爲喻供養衆僧廣設檀會文有所費喻以失穀道士講經說義教人遠惡就善後獲

福無量乃可至道喻如得金甕示語後世人福德不可不作後悔無及

昔有國豐盛安樂無所渴乏便語大臣遣一可使之臣至於他國市吾所無者市來卽遣一人往至他國益將珍寶遍市肆觀看無有餘物盡是我國中所有耳最後見一賢者空坐肆上便問之言不見君有所賣何以空坐答言在此賣智慧耳問曰君智慧何像賣索幾許答言吾智慧直五百兩金前稱爾金吾當與汝說之耳遠人便自念我國中無賣智慧與人便稱五百兩金與其人卽與說智慧之言二十一字言

長慮諦思惟不當卒行怒今日雖不用會當有用時
於是受誦令利各自還家臣買得智慧之言卽便還
國道徑其家夜入月明見婦牀前有兩色履疑有異
人便生惡念其婦卒得疾病母往宿視長者故說智
慧之言未休其母驚覺兒爾來歸耶兒便走出戶呼
賤賤母問其言云何汝行爲得何物何以呼賤兒言
我母以婦萬兩金猶不與人正顧五百兩金豈非賤
耶天尊經借以爲喻諺語一言之助勝千金之益此
之謂也

昔天尊在恒水邊廣說經法時天龍鬼神帝王之民

飛鳥走獸皆來聽法時有放牛老公拄杖而聽不覺
杖下有蝦蟆蝦蟆聽經意美亦不覺背上有杖遂久
蝦蟆命終其神卽生天上用天眼觀其本從何道中
來乃見故身在蝦蟆中來天華散其故身上示語後
世人蝦蟆中聽經意美得生天上況於賢者至心聽
經豈不巍巍乎

昔有兄弟二人弟行追明師作沙門遂得羅漢道數
數來語兄可勤作福德兄言我今心念忽務且須後
耳數數非一兄後命終弟以道眼觀兄神生何道看
天道人道其中不見其神復觀地獄餓鬼道中復不

見乃在畜生道中見兄神作大牛時賈客駕牛治生
道惡跌泥中不能自起賈客以杖打之猶復舒咽不
起弟見兄如此逕來在牛前語兄言今日忽務何如
本時牛便著慙感絕而死道人卽去衆賈人等便共
議言道人何故來呪殺我牛便追逐道人將還問其
意狀道人如事爲說牛是我兄不隨我語以致此罪
道人便擲鉢虛空飛隨其後衆賈人知是聖人乃更
自責爲牛燒香作福其福得生天上其本欲向善中

昔有賢者居舍衛國東南三十里家門奉法供養道
人家公好喜殺猪賣肉道人漸漸知之未及呵誠老
公遂便命終在恒水中受鬼神形有白鐵輪鋒刃如
霜雪隨流刺之苦痛不可言後日道人度恒水在正
與鬼神相值其鬼便出半身在水上捉船顧言捉道
人著水中不者盡殺船上人時有一賢者便問鬼神
何以故索是道人鬼神言我在世間時供養道人道
人心知我殺猪賣肉而不呵誠我是以殺道人耳賢
者便言君坐殺猪乃致此罪今復欲殺道人罪豈不
多乎鬼神思惟實如賢者之言便放令去道人得去
還語其家子孫爲作追福神卽得免苦示語後世人
道人受供養不可不教誠

昔有人在道上行見道有一死人鬼神以杖鞭之行人問言此人已死何故鞭之鬼神言是我故身在生之日不孝父母事君不忠不敬三尊不隨師父之教令我墮罪苦痛難言悉我故身故來鞭耳稍稍前行復見一死人天神來下散華於死人屍上以手摩抄之行人問言觀君似是天何故摩抄是死屍答曰是我故身生時之日孝順父母忠信事君奉敬三尊承受師父之教令我神得生天皆是故身之恩是以來報之耳行人一日見此二變便還家奉持五戒修行十善孝順父母忠信事君示語後世人罪福追人久而不置不可不慎

昔有道人在山中學道道人遣沙彌出舍分衛日日責一升米兼課一偈市中有一坐肆賢者見沙彌並語而行問沙彌言周行走索何以並語而行沙彌答言我師在山中學道日責我米一升兼課一偈是以並行誦一偈耳賢者復問若不輸米日可諳幾偈言可諳十偈賢者便言勿復分衛吾自代沙彌輸米沙彌歡喜卽得靜坐學問賢者爲沙彌輸米九斛然後試沙彌經皆自通利賢者後生世間爲天等作弟子字名阿難天等有十二部經典聰明之福報悉能誦

持智不可量問一知十示語後世人福德隨身如影隨形隨人所種各獲其福不可不爲昔有屠兒有千頭牛養令肥好日殺一牛賣肉已殺五百牛餘有五百頭方共跳騰誼戲共相觸觸天尊時入國見牛如此愍而捨去語諸弟子此牛愚癡伴侶欲盡方共戲誼人亦如是一日過去人命轉減不可思惟勤求度世之道

阿育王譬喻經

三慧經

僧祐錄云安公涼土異經今附北涼錄

佛常欲得三人一者信二者問三者行或有人但信不喜已作爲信不欲行爲喜有三亡一者不布施二者不行戒三者不定意當滅思想乃得道要在不念已滅思想色亦滅識亦滅心有所念是爲四所有對是爲想當有想當無想不離想當離不生想還就不出想當有想者謂道想當無想者謂無色想不離想者謂不離經行想當離想者當離生死想不出想謂無道想不出十二門還就者謂人生死便不得脫

身譬如地善意如禾惡意如草不去草穢禾實不成人不去惡意亦不得道人有瞋恚是爲地生疾藜善意如電來卽明去便復冥邪念如雲覆日時不見已惡意起不見道

學者有苦不學者無有苦學者有苦譬如人田種當先犁去草穢便多得收是爲先苦不學者無有苦者譬如地不犁續自生疾藜惡物是爲不學無有苦行道第一可禁苦第二可禁樂三者不可禁苦四者不可禁樂能樂得樂便行道能苦得苦便行道有人行道得苦便畏生死能行道如是不可與樂有人得

樂能行道意不苦如是不可與苦有人得樂能行道得苦亦能行道如是可與樂不可與苦有人得苦不能行道得樂亦不能行道如是當與苦不可與樂都有四求一者用身故求二者用願故求三者用癡故求四者用行故求人欲保身長壽是爲身求欲得豪貴妻子珍寶是爲願求祠祀鎮厭欲從得福是爲癡求所行非法欲家安隱得道是爲行求

人有三不可保一者喜意二者財寶三者人命身亦可念亦不可念計身諸惡露是爲可念意墮五樂是不可念善亦可念亦不可念謂得道意是可念不可

念者謂以得道意當轉增上惡亦可念亦不可念有過自悔是可念意起墮惡是不可捨念正念邪是爲惑不別是非是爲癡惡有二事一爲本二爲利所作行是爲本受行福是爲利除是便得道

貪護謂已得復貪念色爲貪止爲非一意滅故護貪爲得道貪護爲墮生死已得復護故爲貪護

樂食者謂歡喜飽念食者謂念三十七品經便飽識食者謂樂法已隨痛痒爲裁求後復念爲識求一切世俗事皆屬身一切名字皆屬意一切不犯皆屬戒除是無所有爲道一法復壞道行謂不精進一

法壞人謂慳貪

外惡因緣來向人不受爲忍自身作惡不出爲辱已過去莫復念未來亦莫待

今見在當斷非人所有莫得憂一切有意皆爲結
有善意亦忘有惡意亦忘復用三因緣故一者不習
念二者不數念三者不著意倒是三事不復忘

從有可得無有不可得有是謂三十七品經意生死
意生死無有數所以覺者種忘故本意欲坐行道十
日不能竟十日前世福薄故多福者欲十日坐行便
得身不欲行用劣瘦極故意不欲行不念死敗苦空

故智慧有四相一者聞善語便不轉二者已聽便受
著意三者已失常思惟念四者意已思惟念復重問
欲知其意倒是少慧

有五百人行道得定意恐復失之因取人令殺人報
言殺道人令我得重罪道人言如人有怨家欲殺之
不是身爲是我怨家汝爲我殺佛言當殺意勿殺身
有道人得定意時野火燒之衣不然人見之謂是鬼
便斫之刀斫不入用心一故不燒柔軟故不入有道
人得定意弟子呼之飯不覺因前牽臂臂伸丈餘弟
子大恐因取結之意結不可復取解之師禪覺苦臂

痛問弟子白如是師言汝不解者誤折我臂人得定
意柔軟如綿在母腹中亦爾

有三因緣覺人無所知一者問不如對二者不能問
三者不能語

取要經要譬喻說人逢大水但當取珍寶去人在世
間但當取善意去

人所念不得道何以故不念道因緣有道因緣能得
道謂六波羅蜜安般守意三十七品經是爲道因緣
有五因緣可信一者信佛二者信法三者信戒四者
信經五者信善知識信是五事得道語有四法一者

直語二者分別語三者問語四者止語直語者有點人隨道德因緣直說分別語者爲所以所受不諦當分別本末重語說問語者人自意爲是隨因緣問之卽自知止語者佛所不說亦不說

有四因緣問一者一切問二者分別問三者問問四者止問一切世間非常苦空行道得安隱已說是爲應語是爲一切問若人來問眼事莫持耳徃報是爲分別問若人持白物來言是黑物因持黑物問之見爲何等是爲問問若人來問道何類因報寒何等類若問意何等類因報風何等類若問無爲何等類因

報空何等類是止問

有四顛倒一者非常人意已爲常二者已苦人謂樂三者萬物皆空人謂爲實四者非身貪已爲有身人墮顛倒如是非常計常以苦爲樂以空爲實非身已作身人如是意便得道人意墮四顛倒故計是爲我身諦校計身中無所有已無所有便墮空已墮空便爲無身已無身便墮無爲人有四癡常著四顛倒一者萬物非常自以爲常二者天下皆苦人恃作樂三者天下空人以爲有四者身非身不可保人已爲身五者月始生時拜六者十五日盛明時反踞視之七

者女小時從人抱八者女大不可得見有四貴亦有四賤一者道貴人賤二者珍寶貴人賤三者官位貴人賤四者黠貴癡賤

阿難言人得善知識爲得佛半佛言人得善知識爲得佛道善知識難得何謂爲道德信爲道制身口意爲德人當有三知識一者富家二者事貴三者事大尊者以布施是爲富家以持戒爲事貴者守意念道爲是事大尊者有內治生外治生索錢財諸珍寶是爲外治生守意念道是爲內治生人不能自伏意反欲伏他人意能自伏意他人意悉可伏

有內力有外力有內色有外色有內識有外識能制惡意是爲內力力能有所作舉重頓恚是爲外力痛痒思想生死識是爲內色地水火風空是爲外色意念爲內識眼見爲外識有四事大難一者與得道人共會大難謂十二賢者二者聞經入心難謂在八難處三者如本觀難謂墮四顛四者如法行難謂不能持戒

有五事求道大難一者年老二者疾病三者縣官四者盜賊五者饑渴是爲五事求道大難
有五事難一者值佛世難二者聞經難三者得善師

難四者得善人難五者得作人難
有五難一者貧能布施難二者豪貴能忍辱者難三
者有事對吏不欺者難四者與端正女人同牀意不
亂者難五者制人命不得傷害者難

有七難一者受經能問難二者聞經解意難三者與
多智人對語能自解難四者自教復能教人者難五
者自安隱亦令人安隱難六者已自定意亦令人定
意難七者常不離法至得佛道難

有十八事人於世間甚大難一者值佛世難二者正
使值佛成就得爲人難三者正使成得爲人在中國
生難四者正使在中國種姓家難五者正使在種姓
家四肢六情完具難六者正使四肢六情完具有財
產難七者正使得財產得善知識難八者正使得善
知識智慧難九者正使智慧謹慎心難十者正使謹
慎心能布施難十一者正使能布施欲得賢善有德
人難十二者正使得賢善有德人往至其所難十三
者正使往至其所得宜適難十四者正使得宜適聽
問難十五者正使受聽問說忠正難十六者正使忠
正解智慧難十七者正使得解智慧能受深經難十
八者正使能解深經復重難是爲十八事人於世間

大難
有八處人佛無那何一者瘦人二者聾人三者地獄
中人四者餓鬼中人五者畜生中人六者邊地不知
法義七者長生二十八天上八者受不精進行是爲
八處人佛無那何況有五百人自說言我善佛言汝
審善當隨我後人言諾佛便行入火中五百人皆止
住無敢隨者言善人至難得

有人問佛佛教人作善何等益佛言天下人惱我故
教之耳人復言人有心當恣之佛言坐天下人恣心
故我止住百劫乃得佛道道有七事一者意喜布施
不欲餘二者但欲聞三者但信四者但持戒五者但
欲行六者欲學慧七者但欲脫去佛在世時得脫轉
後世但學慧復轉後世但欲行復轉後世但持戒復
轉後世但信復轉後世但欲聞復轉後世但欲布施
不但持戒當復行不但行當復慧不但慧當復脫去
是七事當并行

有五叢殘世一者上世人長壽今世人短壽二者上
世人端正桃華色今世人醜惡三者上世人多得道
今世人不能得四者上世人博達通知經要今世人

不能通知五者上世人安隱今世人多疾瘦是爲五
叢殘世

有長壽者道人大富財產無數好作布施有人言卿
作布施大多道人報言我從佛聞人在世間往來生
死其日不可數今我所有布施尙不能日用一錢何
以爲多佛說人得一切天下珍寶不如聞佛一言何
以故徒多財產不能離世間故山中揭鳥尾有長毛
毛有所著便不敢復去愛之恐拔覆爲獵者所得身
爲分散而爲一毛故人散意念財產財產不得脫苦
用貪姪故人治生譬如蜂作蜜採取衆華勤苦積日
已成人便竊取持去亦不得自食適自疲極人東走
西走求是作是合聚財寶勤苦不可言已命盡他人
得其財身反得重罪受苦不可量人在世間譬乘泥
船渡河當浮渡船且壞入人身如泥船不可久當疾行
道

金有四試一者燒二者磨石三者鍛四者鍊譬喻人
亦有四試一者燒二者共從事三者色四爲制不止
欲得人相有四因緣一者與共居二者共居當久三
者當共語言四者共可以知之

有四因緣知爲道人一者聞惡亂意卽時轉念二者

不說人惡三者自不墮論議四者能自護如是知爲道人自護

今世四因緣乃受福一者有處二者有時三者業四者師人有所止得安隱如意是爲處如人年三十當富十五時求不可得至三十乃得是爲時若人宜賈白珠亦餘物從得利是爲業遭得明人分別說經心卽開解是爲師有兄弟三人各自謂高健無輩共更持夜二兄居前卧小弟便獨坐有一蟲名爲不吉來噏其髀弟便以手指之蟲便長大復捶益大其人嗔恚取蟲蹴踢自致疲極蟲益大不止其人便止休一

夜已竟便呼仲兄起蟲復噏之兄復如小弟與共鬪蟲更長大至屋如是疲極復止休二夜竟便呼大兄起坐蟲復噏之大兄便持手指摩娑蟲復起兄生意以菴覆之須臾極蟲便出菴去至明日二弟極不能復起兄知二弟與蟲共鬪便問何以不起二弟慚不敢語兄言語蟲共鬪劇耶弟言然兄語弟言後儻有不吉蟲來但以菴覆之不當指也譬喻如癡人得對便瞋恚從得罪如弟與蟲鬪自致疲劇黠人見對來便避之是得福譬如菴覆不吉蟲去

昔有道人爲國王說經王言佛在世多人得道今同

說佛經人不得道佛爲持道法去耶道人言譬天下極美不過蒲桃酒飲一升便可醉持一升水澆一升酒中飲之不能復醉佛在世時說經知人意態譬如人飲一升酒便得醉今我輩不知是佛說經知人意態應病與藥故人多得道

有國王飯諸比丘天來指示王言是人得阿羅漢是人得菩薩是人得道迹是人不持戒王悉覺知持心正等無有異意諸天代其歡喜有國王與人共爭高價浴佛王輒舉高價不止人言今我悉持所有財物妻子自身爲奴婢以浴佛王便不得

阿育王作八萬塔臨死欲絕時菩薩阿羅漢有五百人共守護更爲說經不使諸夫人得近與相見欲令王上天故

有小國王常起征伐大國王思惟言亡身得惡皆從貪愛故我不如以國與之大國王捨國去作白衣在他國久後歸故國有人白言王便勅左右徃捕取殺之臨當死時呼其子囑一言慎勿忘也汝勿念怨家惡當慈心

有國王治行不平侵枉人民受取非法天爲雨不時節有女人言天雨不時節王治行不平正故王已聞

知便呼女人令請雨以三器著地女人願令雨墮中央器中復令從一頭起則如其願王問何因緣得是女人白言我至誠故佛言有地乃有萬物人有至誠乃有道有國王出行見一女人端正無比王意欲殺其夫取是女人傍臣言不當殺當享之國王享其夫以金指環與之語言忘環者殺汝王私呼婦令盜取環已後王呼問其夫環所在夫求不知處便勅臣殺之令美飲食夫恐不敢食人言卿當死何不食夫適欲噉魚因於魚腹中得環是至誠所致

有道人貧窮舉十萬錢用治生便先持三萬布施持餘錢行賈途中爲賊所抄王便以珍寶物匱與之有大囊小囊餘人各取大囊去道人自念言我錢少不宜取大囊便取小囊去其中悉有白珠賣得六千萬用至誠不貪故得是珍寶

昔有國王徵國中諸盲人令於象廄中觀象中有持象足者中有持象鼻者中有持象耳者中有持象尾者去後共相問象何等類持象足者言象大如柱持象鼻者言象如繩索持象耳者言象如簸箕持象尾者言象如大籌皆共諍之盲人各自信其意譬如人各見少所經不達其法自謂大解亦如是

有國王於城外大作伎樂戲舉國中人民皆出行觀
城中有一家其父有疾不能行步家室共扶將令行
言出城便止樹下不能自致語家中言汝自行觀來
還乃持我歸時天帝釋化作一道人過其邊便呼病
人汝隨我去我能令汝病愈人聞之大喜便起隨行
釋將上天至宮見金銀好物甚衆多欲從求之人言
勿得可求勾瓶病人因前到釋所言我欲去願持此
瓶勾我釋卽與之語病人言中有物在汝所願病人
持歸室家相對探之轉得心中所願金銀珍寶恣意
皆得大會宗親諸家内外共相娛樂醉飽已後因取
瓶跳之我受汝恩令我富饒跳踢不止便墮地破之
所求不復得

世間有黠人多無數未有如彌勒者彌勒尙復行學
不貳何況餘乎佛已得道_生行安般守意佛言我從
無數世以來學不貳乃得佛後世人學當那得佛道
以持戒不復作惡有不信意故復犯戒便墮地獄閻
王問之便對言我不作惡閻王復問汝不作惡何爲
是中

有尊者爲賊人所折辱有人言何以不殺之尊者言
我人客未具故人復言我爲卿屈人客尊者言不也

我兵今自具如是二十餘歲殺賊人彼病死人復言
卿不殺之今反自死等者言我兵馬已具何故癡人
當入地獄是爲兵馬具

問曰何等爲能知一萬事畢報曰一者謂無意無念
萬事自畢竟有百念萬事皆失

有道人夜行前未得道人隨其後後人有疑悔前人
舉手五指頭出火復以鑰開戶後人乃覺悟知爲道
人

說經有六衰有人言七衰屋舍衰獨非衰耶佛謂人
言我復饒汝一衰寢爲大衰何以故人說身事反說
屋舍是爲寢

有人墮海中有人教食水盡可得步出人言我已飲
後水復來世俗如是前後相趣不可極

人欲相見有四緣一者其人端正故二者宿命相愛
三者名聞四者欲聞深經安爲知是隱爲自藏自藏
者不見惡態

世間凡有十八道佛一切已知前世皆已學從是不
得道故索知

問人語時聲先生耶意先生乎報意先生何以意覺
聲聲不能覺意故

有人持珠度海失亡其珠人便持木斗舀水棄岸上海神言汝當何時盡是水人言生死棄之不置海神知其意出珠還之

阿毗曇五法行經

安息三藏安世高譯

苦法點可苦法黠習法黠可習法黠盡法黠可盡法黠道法黠可道法黠苦法者謂形體萬物皆當衰老死亡是爲苦癡人謂可常保持是爲樂黠可知是爲苦便不復向生死是爲苦法黠可習法者謂習欲習得習姪習怒習癡習好習美黠可者如是爲習從習得盡便不欲是爲習法黠可盡法者謂人物會當消散滅盡使得亦不喜失亦不憂是爲盡法黠可道法者行道得道作善上天作惡入惡道黠可者知去惡

就善是爲道法黠可黠者覺可者知本不知是爲苦
苦爲一意知爲苦是爲二意習爲一意知爲習是爲
二意盡爲一意知爲盡是爲二意道爲一意知爲道
是爲二意此八意在外

非常苦空非身本習生因緣盡止如意惡道處受觀
盡苦空非身何緣得盡盡從苦來從苦得盡因盡便
得空得空便知非我身是四意爲隨苦諦何等爲苦
一切在生死皆爲苦會欲亦不欲會欲謂人諸所欲
得亦不欲謂人意諸所不欲是皆爲苦貪從習出隨
非常意求滅苦從習得何等爲法謂因緣作是得是
是爲法當爲識已識爲却意當爲斷從四諦中苦諦
集諦爲證有道見苦知從集起見集知苦見盡諦知
非常

何等爲可謂喜道不忘道常求道以道爲可何等爲
黠常問道爲黠已問能受能行是爲黠集亦如是盡
滅亦如是道亦如是

苦爲罪法爲行結黠爲三十七品經可爲行行者爲
行道如是爲集如是爲盡如是爲道皆爲增上
第一爲苦何等爲苦一切惡不可意爲苦已識苦不
欲者便行道不離爲可苦生有本苦爲何等本從萬

物萬物無有亦不盡已不盡人亦不憂已不憂人亦無有苦

第二爲集何等爲集意隨愛爲集斷愛無有集持何等行爲斷愛萬物皆從因緣生斷因緣不復生當那得斷因緣持意念道已持意念道意不得兩念便在道是爲集

第三爲盡苦法爲萬物以敗便得憂已得憂便老已老便得病瘦死是名爲外盡苦法何以故爲外盡苦法爲自罪未除何以故爲自罪未除爲生死未滅何以故生死未滅爲非一意何以故非一意爲不墮禪棄故何以故不墮禪棄不受行如佛語是名爲外盡內盡爲何等意墮守已墮守餘意不得生已餘意不得生便滅結已滅結便罪盡已罪盡便盡無有名爲內盡

第四爲道何等爲道苦可意道名爲八種何等爲八種如是安般守意說八行意不墮生死但有墮道已墮道便斷上頭三事何等三事苦集盡已斷苦集盡便定已定所向便得道何等爲得道已苦滅不復生是爲得有五法行何等五者色二者意三者所念四者別離意行五者無爲

色爲何等所色一切在四行亦從四行所四行行爲
何等地種水種火種風種亦從四行因所色爲何等
眼根耳根鼻根舌根身根色聲香味細滑亦一處不
更

意爲何等所意心識是爲何等六識身六識爲何等
眼識耳識鼻識舌識身識心識

所念法爲何等若所念法意共俱是爲何等痛想行
痒念欲是意定黠信進計念貪不貪善本惡本不分
別本一切結縛傳勞從起所黠所見所要亦所有如
是法意共俱是名爲意所念法

別離意行爲何等所別離意不共是爲何等得不思
想正盡正不思想念想下輩苦得處得種得入生老
死非常名字絕具如應亦餘如是法分別意行是名
分別意行

無爲何等空滅未離滅不須受

地種爲何等堅者水種何等濕者火種何等熱者風
種何等起者眼根何等眼識相著可色耳根何等耳
識相著可色鼻根何等鼻識相著可色舌根何等舌
識相著可色身根何等身識相著可色色爲何等若
色端正不端正等色俱中央色想像上頭一識更眼

識色更爲心識更是色兩識更知何等兩眼識心識聲爲何等從受行出聲亦不從受行出聲從受行本聲亦不從受行本受聲若上頭一識更知耳識已更心識便知是聲兩識更知耳識心識香爲何等若根香若莖香若華香若實香若香香若臭香等香所香是名爲香若上頭一識一識更知鼻識已更心識便知是香兩識更知鼻識心識味爲何等若酢味甜味鹽味苦味鹹味辛味澀味亦所歠覺味若上頭一識知舌識舌識已更心識便知是味兩識更知舌識心識細滑更爲何等若滑若麤若輕若重若寒若熱若饑若渴爲上頭一識知身識已更心識便知是一處樂爲兩識更知身識心識心識一處不更色爲何等若色法識想著是爲何等若身善者不善者不更若常一識知心識

眼識爲何等眼根相依色因知耳識爲何等故耳根相依聲因知鼻爲何等鼻根相依香因知舌根爲何等舌根相依味因知身識爲何等身根相依樂著因知心識爲何等心根相依法因知痛爲何等爲樂是亦爲三輩少多無有量想爲何等所對行爲何等所作是亦爲三輩善惡不分別福殃度願樂爲何等三

會是亦爲三輩善樂惡樂亦不善亦不惡樂意念何等爲意念是亦爲三輩善惡不分別欲爲何等欲作是何等意可意爲何等意思惟何等爲一意點爲何等爲觀法信爲何等可意進爲何等觀念計爲何等所念使求增望念願願是名爲計分別念爲何等所觀觀隨不絕相隨是名爲念計念爲何等異意大爲計意微爲念計念是爲異貪爲何等不隨善法不信至誠不行不應行是名爲貪不貪爲何等隨善法信至誠行應行是名爲不貪善本何等有三善本無有貪善本無有瞋恚善本無有愚癡善本是名爲善本不善本爲何等不善本有三貪爲不善本瞋恚爲不善本愚癡爲不善本是名爲不善本不分別本爲何等有五不分別愛不分別憍慢不分別癡不分別疑不分別行是名爲不分別本結爲何等有九結一爲持念結二爲增結三爲憍慢結四爲癡結五爲邪結六爲失願結七爲疑結八爲嫉結九爲慳結持念結爲何等三界中貪憎結爲何等爲人間不可息憍慢結爲何等憍慢結名爲七輩何等七一爲憍慢二爲憍三爲自慢四爲自計慢五爲欺慢六爲不

如慢七爲邪慢嬌慢爲何等不如我者我爲勝如者等從是嬌慢自計意起意識合意是名爲嬌慢嬌慢爲何等輩中勝勝中等從是所慢亦自計自計勝者勝是名爲自慢亦說者嬌慢慢當爲一切合會是名爲自慢自計慢爲何等爲五陰自身是我身計自念從是慢慢自知意生意起合意是名爲自計慢欺慢爲何等未得計得未知計知未盡計盡從是嬌慢自計意觀意起合意是名欺慢不如慢爲何等遠不如自計少不如若豪若業若業若何若罪若病不及十倍百倍自計如是爲不如從自嬌慢自計自見生意起合念自爲是名爲不如慢邪慢爲何等不賢者自計賢者從是有嬌慢自念自計意生意起合念是名爲邪慢是爲七慢慢名爲嬌慢結癡結爲何等三界中所有疑是名爲癡結耶結爲何等邪結有三輩名爲邪結一爲身邪二爲邊邪三爲邪邪身邪爲何等是身是我身是名爲身邪邊邪爲何等一者斷滅二者常在是名爲邊邪邪邪爲何等邪邪爲諍本壞福是爲三邪失願結爲何等失本不受功校恩是名失願結是兩失名爲失願結盜結爲何等兩盜名盜結一爲受盜二爲戒盜受盜爲何等爲五陰念尊

大最無有極從是所欲所意所可所用是名爲盜結
盜戒爲何等從是淨從是離從是解從是要出用是
故所人所意所可所願是名爲戒盜是兩盜名爲盜
結疑結爲何等爲疑四諦是名爲疑結嫉結爲何等
亂意爲嫉結慳結爲何等不能制意是名爲慳結故
一切結縛結爲何等所結者名爲縛故說縛

使者爲何等使者爲七何等爲七一爲欲使二爲不可
使三爲欲世間使四爲憍慢使五爲癡使六爲邪
使七爲疑使

欲使爲何等欲使名爲五使何等爲五者欲從苦見
斷欲著欲從習見斷欲著欲從盡見斷欲著欲從道
見斷欲著欲從思惟見斷欲是名爲五使名爲欲使
不可使名爲何等五使名爲不可使何等爲五從苦
見不可斷從習見不可斷從盡見不可斷從道見不
可斷從思惟見不可斷是五使名爲不可使世間欲
可使爲何等十使名爲世間可欲使何等爲十著色
見苦斷欲著色見習斷欲著色見盡斷欲著色見行
道斷欲從色因著思惟斷欲從無有色因著見苦斷
欲從無有色因著見習斷欲從無有色因著見盡斷
欲從無有色因著見道斷欲從無有色因著思惟斷

欲是十使名欲世間使憍慢使爲何等憍慢使有十五何等爲十五著欲見苦憍慢斷著欲見習憍慢斷著欲見盡憍慢斷著欲見道憍慢斷著欲思惟見憍慢斷著色見苦憍慢斷著色見習憍慢斷著色見盡憍慢斷著色見道憍慢斷著色思惟憍慢斷著無有色見苦憍慢斷著無有色見習憍慢斷著無有色見盡憍慢斷著無有色見道憍慢斷著無有色思惟憍慢斷是十五使名爲憍慢使憍使爲何等十五使名爲憍使何等爲十五著欲見苦癡斷著欲見習癡斷著欲見盡癡斷著欲見道癡斷著欲思惟癡斷著色見苦癡斷著色見習癡斷著色見盡癡斷著色見道癡斷著無有色見苦癡斷著無有色見習癡斷著無有色見盡癡斷著無有色見道癡斷著無有色思惟癡斷著無有色等三十六使爲邪使何等爲三十六十二使著欲十二使著色十二使著無有色是名爲三十六使十二使著欲爲何等著欲見苦斷身邪著欲見苦斷要邪著欲見苦斷邪邪著欲見習斷邪邪著欲見盡斷邪邪著欲見道斷邪邪著欲見苦斷見盜著欲見習斷見盜著欲見盡斷見盜著欲見道斷見盜著欲見苦

斷戒盜著欲見道斷戒盜是名爲十二使著欲使十二使著色爲何等著色見苦斷身邪著色見苦斷要邪著色見苦斷邪邪著色見習斷邪邪著色見盡斷見盜著色見盡斷見盜著色見道斷見盜著色見苦斷戒盜著色見道斷戒盜是名爲十二使著色使十二使著無有色爲何等著無有色見苦斷身邪著無有色見苦斷要邪著無有色見苦斷邪邪著無有色見色見習斷邪邪著無有色見盡斷邪邪著無有色見道斷邪邪著無有色見苦斷見盜著無有色見習斷見盜著無有色見盡斷見盜著無有色見苦斷戒盜著無有色見道斷戒盜是名爲十二使著無有色使是爲三十六使名爲三十六邪使疑使爲何等十二使名爲疑使何等十二著欲見苦斷疑著欲見習斷疑著欲見盡斷疑著欲見道斷疑著色見苦斷疑著色見盡斷疑著色見苦斷疑著無有色見苦斷疑著無有色見習斷疑著無有色見盡斷疑著無有色見道斷疑是名爲十二疑使是爲塵是爲塵惱有時塵無有惱者除塵所餘亂意念法是爲惱非塵從起爲八一爲睡二

爲瞋三爲樂四爲疑五爲猗六爲盜態七爲不愧八爲不慙是故說從起八

所點爲何等十點何等爲十一爲法點二爲比點三爲知人心點四爲巧點五爲苦點六爲習點七爲滅點八爲道點九爲盡點十爲無爲點

法點爲何等在生死欲所無有結點在生死欲本所無有結點在生死欲滅無有結點在生死欲壞道行無有結點亦在法點亦在法地所無有結點是名爲法點比點爲何等在色無有色行無有結點在色無有色本無有結點在色無有色行滅無有結點在色無有色行斷爲道無有結點亦在比點亦在比地無有結點是名爲比點知人心點爲何等所點行所點福所點合已得不捨常在前常念不妄爲人故爲他衆故思行是故意念如是名爲知人心點巧點爲何等世間所行點名爲巧點苦點爲何等受五陰非常苦空非身念所無有結點是名爲苦點集點爲何等世間本亦本集生因緣思念無有結點是名爲集點減點爲何等減減爲黠最要念不結黠是名爲減黠道黠爲何等道爲道如應受觀者欲出念無有結黠是名爲道黠盡黠爲何等已識苦已捨習盡以有證

道已行從是黠見知意得應是名爲盡黠無爲黠爲何等苦已更不復更習已畢不復畢盡已有證不復用證道已行不復行從是所黠所見所知所意得是名爲無爲黠故說所黠所有見爲何等所有黠見爲見有時見非黠爲何等八更者可八更者可爲何等苦法黠可苦譬黠可習法黠可習譬黠可盡法黠可盡譬黠可道法黠可道譬黠可故說所見若得是爲黠不有時得非黠八更可如上說故說所更

德爲何等得法爲得無有思想思惟爲何等天上一

處名爲一切淨在有無有欲前有思想出所意念法滅不隨是名爲不思想思惟滅思惟爲何等二十八天上名爲不欲中得道者上頭行要出所意念法滅到是名爲滅思惟

不思想爲何等無有思想人化生天上上頭意亦墮天上時意除是中間乃從是若意念法滅倒是名爲不思想

念根爲何等三界中命會爲何等人同居得處爲何等同郡縣種得爲何等爲五陰入得爲何等所內外得入是名爲入得生爲何等得陰老爲何等陰熟止

何等宿命行來望非常爲何等已生復亡名字爲何等知分別絕爲何等字爲具政用爲何等字會空爲何等虛空無所有無所著無所色是名爲空盡尚未離爲何等已盡不復更不復著盡爲何等度世無爲是名爲五法五行行說具

阿毗曇五法行經

音釋

摩

忙皮切
羈縻也

抖擞

抖當口切
振舉之貌

鉢

此遙重也

跌

徒結

切

踳

徒

也

切蹠

典禮切

跛

子六切

躡

於浪切

菴

於浪也

匱

居太切

踢

跳他弔切

跔

徒浪切

武林居士金性清施賈刻此
阿育王譬喻經計一萬二千一百七十
四箇該銀六兩零八分七厘伏願
六根雪淨三障冰清卽生啓悟妙心世世弘開
道眼龍山釋海瓊對
崇禎四年孟冬月徑山寂照識

三經同卷

賓頭盧突羅闍爲優陀延王說法緣經
請賓頭盧經

大勇菩薩分別業報略經

賓頭盧空羅闍爲優陀延王說法緣經

宋 天竺三藏求那跋陀羅譯

欲樂味甚少憂苦患甚多是以智者應修方便速離
衆欲勤行_並我昔曾聞于福王子名優陀延紹父
王位住拘舍彌城其城殊妙寬博嚴淨晃爛宮觀映
飾綺麗牕牖通疎交絳珠網樓觀千萬莊校此城街
巷相當阡陌齊整市肆充盈多諸珍寶其城周帀有
好林苑樹木翠蔚萃果茂盛泉流清潔生衆蓮華青
黃赤白文色相映鴻鴈鶯鶯孔雀鸚鵡迦陵頻伽命
之鳥其聲相和猶如樂音莊嚴之盛如寄羅婆山

王崇巖峻嶽而自莊嚴又像帝釋所居喜見之城優
陀延王形貌端正威相具足聰明黠慧武勇絕倫才
技兼修靡所不知善能呪象令諸山象咸來赴集又
能控御皆令調順又善彈琴和雅中節官商相應鳥
獸率舞合衆香丸用降忽敵香氣所及盡來歸順善
能刻畫曲得相貌其所圖像真形無異六十二藝悉
皆備具衣服飲食不尚豐奢矜窮敬老存恤民庶正
法治國日夕忘倦禮儀法律一依古典如昔哲王什
奢之等國富民殷庫藏盈溢福德之人集生其國受
王風化咸皆修善博通經學明解諸論世間典籍無

不綜練勇健雄武如羅摩延阿純之等由王先身辟
支佛所種諸善根獲報如是王之威德隣國畏伏道
化光被聲聞天下時輔相子名賓頭盧突羅闍姿容
豐美世所希有聰明智慧博聞廣識仁慈汎愛志存
濟苦勸化國民盡修十善信樂三寶出家學道得具
足果遊行教化還拘舍彌城欲度親黨徧行乞食乞
食已訖於林樹下結跏趺坐思惟入定時有一人識
賓頭盧來白王言昔輔相子賓頭盧者今近在此林
中樹下王聞歡喜心懷敬仰便勑嚴駕將諸宮人眷
屬僕從詣尊者所問訊旣竟命王就坐王卽思惟所
所問我當爲王分別解說王以偈問曰

一切世人 貪著五欲 縱情放逸 以自娛樂
如汝今者 獨處空閑 捨離恩愛 有何榮樂
尊者答言我觀因緣皆悉無常是故出家以割情愛
樂於林藪猶如野鹿專心勤修永斷煩惱以智慧斧
破愛樹枝心無戀著毒果消滅諸結駛流生死暴河
我已得渡更無憂患譬如飛鳥得免羅網凌虛遠逝

名曰解脱王聞斯語語賓頭盧今我勢力能伏諸國威德暉赫有如盛日首戴天冠瓔珞盛服美女侍衛如天帝釋汝今獨處頗羨我不尊者答言我無羨心王復問言何故於我而不願羨尊者答言我於今日欲泥已乾諸有結縛今已解脫乃至帝釋諸妙天女不生羨尚況汝人間鄙穢者乎誰有智者得離魔縛渡生死岸得淨慧眼壞無明闇而羨王耶何有明眼羨於盲者何有強健而羨病患何有無罪而羨獄囚何有巨富羨於貧窮何有高貴而羨奴僕何有智者羨於愚癡何有勇健羨於憚弱王聞是已心懷懊惱

而作是言汝作方喻一何苦劇我寧困劣乃如是乎尊者答言王無慧眼煩惱所病四取駛流之所漂沒失於勇健不能精勤如斯嬰愚不識真諦沈淪苦海是王之分於五欲中生希有想如此之想實違淨行王復問言有何等過而言違失尊者答言此五欲者衆苦之本害於衆生所有善根如雹害苗蟄惱衆生甚於毒蛇亦如熾火能燒功德亦如野馬詎惑凡夫亦如幻化迷惑者欲詐親善過於怨家欲如老牛沒溺淤泥欲如大綱纏裹三界欲如劙道難可履蹈欲能繫閉殺害衆生一切過患皆從欲起如往古時

有婆須天由欲因緣爲婆利阿修羅之所繫縛擲沸湯中婆勒天壞阿修羅城郭殄滅其民惱觸苦婆羅王種八純提王及彼百子悉皆誅滅鼻多羅阿修羅害於千眼羅摩害十頭羅刹及數千億羅刹之衆羅漫害因陀羅具翼又王摩羅支王滅多摩羅質種族迦帝毗爲闍摩尼婆羅門所殺毗那悉那害提頭頰吒眷屬班紳五子殺十八億人弱匿安毒多羅蹭伽王種俱羅王種彌緜羅檀特伽王種是等人王皆爲欲故更相殘滅卽說偈言

王位雖尊嚴 代謝不暫停 輕疾如電光

須臾歸磨滅 王位極富逸 愚者情愛樂
衰滅死時至 苦劇過下賤 王者居高位
名聞滿四方 端正甚可愛 種種自嚴身
譬如臨死時 著華鬘瓔珞 餘命未幾時
王位亦如是 王者譬如鳥 常懷諸恐怖
行住及坐卧 乃至一切時 於其親疎中
恒有疑懼心 臣民宮妃后 象馬及珍寶
國土諸所有 一切是王物 諸王捨命時
皆棄無隨者 人王及天王 阿修羅王等
威力逼人民 斧鉞相殘害 不識無常苦

橫增貪疾惱 譬如妙華林 金蛇睡在中

愚人謂珍寶 盛裏賣歸家

蛇覺縱毒火

焚燒其屋宅 王位如華林

災患如金蛇

愚人以爲貴 智者所不樂

譬如以搏肉

置四衢道頭 狐狼鵠鷺等

競來諍食之

王位亦如是 衆共諍取之

鳥獸以葉爪

爪齧共鬪諍 王者以刀矛

相害諍榮位

亦如彼鳥獸 愚癡等無異

我寧食灰土

果菜以自存 此身如癰瘍

食歸當潰爛

云何爲此故 造作衆惡業

如食菴婆果

香味悉具足 及其果消時 身體盡爛壞

王位如彼果 失滅生苦惱 譬如有方土

災疫行疾病 有智諸勝人 宜應速遠離

若不遠離者 如逆風執炬 不捨必自燒

如渴飲鹹水 無有飽足時 如十頭羅刹

城郭及眷屬 爲欲因緣故 減壞無遺餘

又如寄越王 兄弟有百人 爲欲因緣故

亦皆盡敗滅 日種槃趙王 及提頭賴吒

如是諸王等 盡爲欲所滅

當知國土猶如羅網亦如羈絏如深淤泥亦如洞波

又如海浪如林被燒亦如危岸猶如地獄誰有智者當樂貪著如是大苦誰有智者當生樂想如是大王嗚呼怪哉被欺乃爾被誑乃爾猶如空拳誑於小兒速疾不停猶如幻化五欲欺誑亦復如是猶如後猴在高山頂見雲彌布以爲堅實謂爲是地便以身投墮百丈巖喪其身命一切碎滅亦如野干見甄叔迦樹其果似肉見落地時便往欲食知其非肉更復生念今此非肉彼樹上者必當是肉遂便守之爲其所困五欲誑王亦復如是亦如商賈以僞珠誑人五欲誑王亦復如是又如嬰愚嗜味食歡喜尤人以泥團而來誑之謂爲真實走遂疲苦乃得泥團如熱時談誑渴愚夫猶如衆人前豎於幻橛能使時衆見種種事若拔幻橛色像卽滅猶如畫匠及機關師如狗吠井自見形影怒眼豎毛謂井底影欲共已鬪橫生瞋忿投井而死大王宜善觀察何有五欲而得常者何有王位而得久停尊豪威勢無得住者何有國界而不遷壞何有珍寶而不散失何有欲樂常恒不變苦性實苦皆從妄想而生於樂何有諸行不似芭蕉乾闥婆城大王云何處生老病死衰禍恐怖逼迫之中

云何能爲國土少樂生愛樂想如林中鹿四邊火起
如鳥在籠如魚處網如龜吞鉤如師子毒箭入心如
龍處呪場如人在屋中四邊火起如處危朽華堂速
疾崩墜如好華池有水羅刹喻食於人重說偈言

生老病死患於中未解脫無明愛毒箭

猶未得拔出

人帝汝云何而生樂著想

如象處林中

四邊大火起處此急難處

云何有歡樂

大王應當知榮位須臾間

智者深觀察

不應於此事而生希有想

汝何故錯解

實是愛奴僕而生高貴想

捨上妙財寶而生大富想

不善解方便

橫生智慧想

爲衆煩惱患橫生無病想

未脫生死胎

橫生無畏想處十二刺林

橫生無刺想

欲賊劫諸根橫生無賊想

大王而此身者必歸敗壞尊豪榮貴必有衰滅財寶

庫藏必有散失大王如佛言曰榮位如寢恩愛譬如

汝於五欲生於希有難遭之想賢德於此豈得名爲能善觀察何以故榮位恩愛必有別離如衆飛鳥夜

栖一樹晨則四散又如客舍夕則聚賓朋各異路亦如乘船異人同載既至岸已各自殊道亦如駛流漂

集衆木須臾之間隨流分散猶如浮雲須臾散滅作音樂處男女聚集作樂已訖各自散去宮人嬌女端正美妙無常理會會歸捨棄譬如華樹蜂集其上華彫落盡諸峰遠離如華池枯涸特象不入如大池水鶴樂遊居及其乾竭更不復近福盡之家榮利不近如密雲聚集電光暫現如風吹雲電光不現彼不捨汝汝必捨之如似夏盡孔雀毛羽悉皆自落如寒既至鴻鵠遠池如阿輪伽樹華葉盛時人所愛樂及其枯悴無有華葉人不顧視猶如華幢貴者愛敬華萎縷絕而便棄之卽說偈言

無常不堅固 如芭蕉水沫 亦如浮雲散

天王尊勝位 危脆亦如是 人帝應當知

貪利極速駛 如水注深谷 嗜欲極輕疾

動轉如掉索 愚癡深爲谷 不覺致墮落

尊者言大王我今爲王略說譬喻諸有生死著味過患王至心聽昔日有人行在曠路逢大惡象爲象所逐狂懼走突無所依怙見一丘井卽尋樹根入井中藏有白黑鼠牙齧樹根此井四邊有四毒蛇欲螫其人而此井下有大毒龍傍畏四蛇下畏毒龍所攀之樹其根動搖樹上有蜜五滴墮其口中于時動樹樺

壞蜂窠衆蜂散飛唼蟹其人有野火起復來燒樹大王當知彼人苦惱不可稱計王愁憂獸惡而言彼人得味甚少苦患甚多其所味者如牛跡水其所苦患猶如大海味如芥子苦如須彌味如螢火苦如日月如藕根孔比於大虛亦如蚊子比金翅鳥其味苦惱多少如是尊者言大王曠野者喻於生死彼男子者喻於凡夫象喻無常丘井喻於人身樹根喻人命白黑鼠者喻晝夜齧樹根者喻念念滅四毒蛇喻四大蜜者喻五欲纏蜂喻惡覺觀野火燒者喻老下毒龍者喻死是故當知欲味甚少苦患甚多生老病死於

一切人皆得自在世間之人身心勞苦無歸依處衆苦所逼輕疾如電是可憂愁不應愛著大王今我語王言雖麤惡實是利益王聞是語衣毛皆豎悲喜交集涕泣流淚卽起合掌五體投地白尊者言我之愚愚無有智慧我之下賤作斯狂言如是狂言聽我懺悔尊者言我於今者以忍出家無不忍受我心清淨猶如秋月淨無雲翳王今懺悔願使大王猶如天帝得見道跡王大歡喜與諸眷屬作禮還宮

賓頭盧突羅闍爲優陀延王說法緣經

請賓頭盧經

宋 三 藏 簡 譯

天竺二國有優婆塞國王長者共設一切會常請賓頭盧頗羅墮誓阿羅漢賓頭盧者字也頗羅墮誓者姓也其人爲樹提長者現神足故佛擯之不聽涅槃勅令爲末法四部衆作福田請時於靜處燒香禮拜向天竺摩犁山至心稱名言大德賓頭盧頗羅墮誓受佛教勅爲末法人作福田願受我請於此舍牀敷上宿若作屋舍亦應請之言願受我請於此處食若新普請衆僧洗澡時應請之言願受我請於此洗浴及

未明前具香湯淨水澡豆楊枝香油調適冷暖如人浴法開戶請入然後閉戶如人浴訖頃衆僧乃入凡會食洗澡要須一切請僧至心求解脫不疑不昧信心清淨然後可屈近世有長者聞說賓頭盧阿羅漢受佛教勅爲末法作福田卽如法施設大會至心請賓頭盧覩飪下偏布華欲以驗之大衆食訖發飪飪華皆萎懊惱自責不知過所從來更復精竭盡家財產復作大會猶亦如前懊惱自責更請百餘法師求請所失懺謝罪過始向上座一人年老四布悔其愆咎上

座告之汝三會請我我皆受請汝自使奴門中見遮
以我年老衣服弊壞謂是被擯謫滯沙門不宜見前
我以汝請欲強入汝奴以杖打我頭破額右角瘡是
第二會亦來復不見前我又欲強入復打我頭額中
瘡是第三會亦來如前被打額左角瘡是皆汝自爲
之何所懊惋言已不現長者乃知是賓頭盧自爾已
來諸人請福皆不敢復遮門若得賓頭盧其座華卽
不萎若新立房舍牀榻欲請賓頭盧時皆當香湯灑
地燃香油燈新牀新褥奮綿敷之以白練覆綿上初
夜如法請之閉房慎勿輕慢闕看皆各至心信其必
來精誠感徹無不至也來則褥上現有卧處浴室亦
現用湯水處受大會請時或在上座或在中座或在
下座現作隨處僧形人求其異終不可得去後見座
華不萎乃知之也

請賓頭盧經

大勇菩薩分別業報略經

宋天竺三藏僧伽跋摩譯

最勝無上尊 知見悉具足 是故稽首禮

及法應真僧 我今撰安住 知見具足說

五趣所緣起 由淨不淨業 普爲諸世間

開示契經義 隨智力所及 分別業果報

佛以法自覺 諸天咸勸請 卽至波羅奈

演暢真諦義 謂苦及苦因 苦集究竟滅

八正悉具足 盡苦清淨道 無上人中尊

說苦業果報 從是轉相生 煩惱及諸業

種種相煩惱 無量諸業行 次第略分別

隨順大仙說 契經所顯示 不違諸法相

真實決定義 慧者當受持 非自在所作

果報非無因 亦非自性起 亦不從時生

自在天無因 自性及與時 以果有勝劣

當知彼非因 無知生煩惱 從是起諸業

因業開衆趣 今當說差別 造諸不善業

隨業入惡道 彼諸罪衆生 閻王慈哀說

生老病死苦 王法所拘執 汝見彼天使

何不生勝覺 惠施清淨戒 能調身口意

汝爲何所求 而不發上願 不幸遇惡友
唯聞非法事 增我貪恚癡 何由起淨業
汝曾不修善 但作諸惡行 不覺罪報至
今來入地獄 驅向地獄門 恐怖身毛豎 卽執罪衆生
衆合二呌呼 無擇大地獄 燒熱及大熱 土海及糞池
灰河鐵鎧獄 鋒利劍葉林 刀道劍枝樹
今當說彼業 苦報差別相 等活若黑繩 造諸惡業者
經歷億千劫 今聞結怨憎 生此泥犁中
陷人以非道 兩舌離親友 謾謗及妄語
死墮黑繩獄 屠捕及餘殺 死入衆合獄
諸山所磨切 身碎血髓流 爲政無慈惻
峻法多因緣 廣設諸方便 種種加楚毒
亦入衆合獄 隨業受苦報 輸轉崩山芒
鐵石所磨擣 隨食恚癡怖 聽訟違枉直
亦入衆合獄 鐵輪斷其身 自恃強力勢
喫暴陵孤弱 亦生衆合獄 黑象競來踐
逼迫多人衆 令彼大號泣 死墮呌呼獄
舉身常洞燃 斗秤欺誑人 心惡而口善

言行無誠實 入大叫呼獄 呼哉大呼獄

見者身毛豎 於中受劇苦 寄付不還故

非法言是法 見法言非法 邪見無因果

悔傲謗賢聖 如是諸人等 死入無擇獄

父母賢善人 沙門婆羅門 犯忤令憂惱

死入熱地獄 父母賢善人 沙門婆羅門

惡心加苦痛 死入大熱獄 出家清淨行

虧犯律儀戒 展轉相形毀 死入熱土海

越禁捨正命 邪詔營穢生 死入熱糞池

毒蟲貫骨髓 眇獵焚林澤 燒害陸衆生

死入火劖獄 燒剝斷支節 誘取諸衆生

詐親害其命 烏鵠羣餓狗 競來食其肉

毀壞正法橋 導人非法行 死經利刀道

截足斷肌骨 長身百足蟲 貌像端正女

纏身唼髓腦 由彼邪姪故 於他婦女身

摩觸深染著 驅上劖枝樹 往還貫身體

種種設方便 殺諸水蟲類 死入沸灰河

舉身悉糜爛 吞食熱鐵丸 融銅灌其口

鐵釘釘其身 盜竊他財故 增上十不善

神逝入地獄 盜罪墮畜生 餘則入餓鬼

恚憎不善行 心常樂惡法

見他苦隨喜

死作閻羅卒

已說諸業行

重者入地獄

今當說畜生

餓鬼業果報

身三口四過

及意三不善

此業若非增

死墮畜生趣

多欲生鵝鴨

孔雀鴛鴦鳥

愚癡業所生

蛆蟻飛蛾等

無智好打縛

報生象馬中

或復作牛羊

麋鹿諸野獸

瞋恨作蛇蛇

蜂蠍毒蟲類

憍慢自矜高

恶心密懷害

報生舍羅婆

及作虎師子

虛傲踈儉報

猪狗驢狐狼

慳惜不惠施

嫉忌多憎惡

輕躁心不住

死墮猿猴中

強顏少羞耻

無節多言說

隨業獲果報

後受烏鳥身

邪貪無厭足

兩舌離親友

後受貓狸身

或作熊羆等

修行大布施

急性多瞋怒

不依正憶念

作大力龍

能修大布施

高心陵憚人

由斯業行生

大力金翅鳥

劫盜賢善人

飲食諸餚餚

墮富單那鬼

食糞及死屍

欺怖愚厄劣

疾病諸貧乞

後作富提鬼

常食諸胎網

顰蹙鄙陋行

慳惜多貪求

死作賤餓鬼

形體甚黑瘦

慳貪不布施 或施還自毀 死墮食吐鬼

唯膳膾涕唾 自不修福惠 毀他行布施

慳惜甘麤澀 樂習鄙穢行 居伏竇下流

恒食諸不淨 常希他人物 有財不食用

寧棄不行施 死墮瞋餓鬼 好發他陰私

害人取財物 餘罪墮餓鬼 常食人精氣

麤言觸惱人 好發他陰私 剛強難調伏

生啖口餓鬼 煙然他鬪訟 積財常恐盡

無慈性剛強 後作食蟲鬼 常歎諸蛾蟻

舉身皆火然 抑止他人施 有財不肯捨

生作巨身鬼 腹大咽如針 不施不自食

積聚爲子孫 以此業緣故 復生輕餓鬼

子孫爲修福 因是得信食 若爲聚落主

逼取多財施 死作鳩槃茶 飲食常隨意

若多殺衆生 以肉爲施惠 餘罪作羅刹

常得衆美食 微恚少憂感 常作修布施

香華自嚴身 好作諸妓樂 後作乾闥婆

爲天執樂神 爲利而行施 多瞋好兩舌

後作毗舍闍 其身甚醜陋 髢髮而赤眼

利爪長牙齒 逼他取財物 而以廣行施

性樂心輕躁 生爲負多鬼

多瞋性難滿

好樂修布施 嗜酒喜歌舞

後生作地神

與乘獻父母 紿施親善人

稟性多慳惥

生作遊空神

宅舍乘飲食

生作虛空神

以此修惠施

畜生餓鬼趣

常與宮殿俱

修種種淨行

我已略分別

今當如實說

善道人天果

不害生爲本

後生善趣中

樂修諸功德

隨業受果報

天人阿修羅

欲求長壽者

慧者應當知

慈愍不害生

堅固不傾動

所生離諸難

於諸羣生類

不捶打繫縛

由斯不惱業

所生常無病

未曾修布施

亦不盜他財

所生常短乏

多求而少獲

能廣行布施

而復奪他物

所生常得財

隨得尋復失

常不盜他物

時復行少施

方便獲財利

所得恒不失

常不盜他物

兼復廣行施

所生輒大富

得財常不失

決定修齋戒

所生遇正法

衆見悉愛樂

名聞普流布

身心常安樂

易滿知止足

夷泰無憂惱

質直修正行

欲報所生恩

信心修福業

隨其所生處 常得父餘財 若以飲食施
長壽好色力 辨慧多財寶 無病心安樂
施衣得慚愧 神儀高勝尊 人相悉具足
覩者莫不欣 其身常安隱 心適恒喜歡
施屋得舍宅 宮殿極嚴麗 寶藏悉盈滿
衆具隨所欲 若施井浴池 及與淨水漿
生生無渴乏 所欲常隨意 橋船濟未度
履屣施徒跣 常得象馬車 是則人中天
若以園林施 常獲勝妙果 一切所依蔭
心安無熱惱 衆人所愛樂 眷屬悉具足

若人施醫藥 後生得無病 長壽常安樂
具足色力財 無量百千世 不經疫病劫
終遇法醫王 永拔生死根 造廁除衆穢
後無便利患 身心常清淨 見者莫不歡
緣是離諸垢 究竟獲大安 若爲生天施
或復求名聞 酬恩及望報 恐怖故行施
獲果不清淨 所愛多麤澀 祖先建立施
子孫續不絕 所生蒙遺慶 無量餘財寶
常歎施功德 有財而不捨 所生恒貧匱
欲施無財德 常歎布施德 懈念常周恤

所生得大富	不樂修福業	常樂修智慧
而不行布施	所生常聰哲	貧窶無財產
唯樂行布施	而不修智慧	所生得大財
愚闇無智見	施慧二俱修	所生具財智
二俱不修者	長夜處貧闇	布施無正信
後得饒財物	所受悉麤澀	其心常樂著
深信行施惠	生得上財寶	所受皆莊嚴
其心常愛樂	善知良福田	恭敬歡喜施
所生眷屬和	俱受安樂報	心常輕布施
慢意供福田	後生多財物	雖得不能用
瓦器無異聞	衆所不敬慕	心不輕布施
恭敬修福慧	生得殊勝財	親族悉宗敬
隨所應惠施	其心常歡喜	生得如意財
以道而受用	乘理獲財物	智慧修布施
財寶自然至	所得皆不失	時施無畱難
明解修福慧	少求多所獲	常得應時物
若人修淨行	遠離他所愛	生得賢良妻
容德悉具足	慧者常遠離	非處非時行
心安身無過	具足丈夫法	清淨修梵行
賢聖所稱讚	受身常鮮潔	令聞遠流布

衆人所瞻仰 諸天咸供養 若人於此世

遠酒離迷亂 強志不忘誤

義辯得無異

若人不妄語 至誠不虛欺

受身悉具足

不染惡名稱 若人不兩舌

方便善和諍

生爲人中尊 眷屬常不壞

若人不惡口

美言悅衆聽 恒聞清淨音

宣揚勝妙法

若人於此世 遠離無義言

誠實及應時

知量饒益說 後生言常正

聞者樂信行

若不貪他物 未曾起求想

所生心安樂

常得天勝財 若不起瞋恚

打縛惱逼心

常好修慈忍 後生昇梵天

若人於今世

深信具正見 有無真實說

習近善知識

後生天中上 慧光踰日月

如上所宣說

無量清淨業 隨行各受生

世間種種報

若欲求大利 名稱生天樂

無常求堅固

當勤修德本 作淨不淨業

莊嚴種種果

若生人道中 雜受黑白報

童子及盛壯

中年衰老時 斯各隨本緣

迭受苦樂報

諸業作已增 是則次第受

雖作不增長

久乃獲果報 若人施不恒

中間致貧匱

若常修惠施	富樂無窮已	若人多瞋恚	
後生恒醜陋	慈忍無忿怒	受身常端正	
若人不修慧	所生常癡闇	好智習多聞	
明哲遇賢聖	若能伏驕慢	轉身生勝族	
愚惑自矜高	常生卑賤中	詔諛致身曲	
訛言形矬陋	見聖心不喜	所生常愚惱	
瘡瘍不能言	目盲無所見	尊長師善友	
慈心安慰說	貳捨不聽受	所生常聾聵	
洗浴諸有德	供養妙香華	斯人所受生	
身相悉端嚴	肌體極柔軟	淨如鍊真金	
污所不應汚	邪行犯非處	害形毀衆生	
由斯受閼身	若人於今世	愛欲心熾然	
身口及諸根	盡習婦人法	後常受女身	
多欲不聰慧	若人施燈燭	演說清淨道	
迷者示正路	等愛視衆生	後得清淨眼	
明徹無障礙	子愛視衆生	哀愍諸貧病	
所生多子孫	如月在衆星	慈母乳嬰兒	
奉齋修淨行	懷妊他所愛	一切悉不犯	
由斯淨業故	生得多子女	圍達自娛樂	
猶如天帝釋	虔敬禮父母	恭肅諸所尊	

後生常高貴 身體極柔軟

若人於今世

堅固持律行 後得不動財

猶如雪山王

若人於今世 常不越儀法

若彼求不求

等施令滿足 後生得妙相

師子方頰車

具足無盡財 如海珍寶渚

身口意清淨

兼復行布施 於他無嫉心

已財不守護

由斯業行報 後生鬱單越

若人慕名聞

及求生天樂 依憑善師學

身口意清淨

所有諸財物 愛樂加守護

由斯業緣故

後生四王家 若人於今世

志强不隨人

所行多幻僞 亦修諸善法

樂觀他鬪訟

兼行好布施 由斯業緣故

後作阿修羅

孝順淨供養 父母諸尊長

忍辱少瞋恨

不樂觀鬪訟 由斯業緣故

後生忉利天

若人自不鬪 亦不觀他諍

精勤修善法

得作夜摩天 於身善觀察

好學集多聞

專精思惟義 樂修淨功德

由斯業緣故

後生兜率天 修習勝布施

樂誦諸經典

方便行善法 自力不由他

慇懃精進故

後生化樂天 修行勝布施

善攝護諸根

精勤不退轉 欣樂他功德 由斯業緣故

後生他化天 捨離熾然欲 修習四梵行

離生欣樂俱 轉身生梵宮 又離覺觀心

亦度離生喜 定生喜樂俱 上生光音天

離定生喜樂 一向與樂俱 捨念三摩提

生彼徧淨天 悉已度苦樂 不苦不樂俱

捨及清淨念 得生廣果天 覺知雜想過

及狀五種有 深愛著無想 生彼無想天

世俗及無漏 修習諸熏禪 熏禪正受力

生五淨居天 修習輒中品 無煩無熱天

修習上三品 次生三淨天 如是次第上

乃至色究竟 依色無常想 起修無量空

次觀無量識 捨至無所有 久離無所有

乃至非非想 我已說生死 有有果報等

於彼業果報 慧者當觀察 應修清淨業

離苦疾受樂 已說諸生死 種種業差別

非自在天生 亦非自然有 非時非無因

唯從煩惱起 觀彼有無常 慧者不染著

出離諸縛繫 永到安隱處

大勇菩薩分別業報略經

音釋

舍羅婆

楚語此云

八脚獸

弱也

切

業

卽委切

翁

許及切

寢

莫鳳切

與夢同

檉

五庚切

邢桂也

窠

苦禾切

與窠同

足履寢

其矩切

貧也

跔

昨禾切

短也

惄

丑絳切

愚也

閑

於炎切

地也

無禮也

跔

短也

跔

丑絳切

跔

歸

安居士嚴爾

珪施

背刻

賓頭盧突羅闍爲優陀延王說法

緣經

三經同

卷

計字七千八百箇

該銀三兩九錢

伏願六根雪淨三障水清卽生啓悟妙心世世

弘開道眼

龍山釋海瓊對

世世

崇禎五年孟秋月徑山化城寺識

坐禪三昧法門經卷上

僧

秦

法

師

羅

刹

什

譯

導師說難遇

聞者喜亦難

大人所樂聽

小人所惡聞

衆生可愍傷

墜老死險路

常爲恩愛奴

處畏癡不懼

世界若小大

法無有常者

一切不久留

暫現如電光

是身屬老死

衆病之所歸

薄皮覆不淨

愚惑爲所欺

汝常爲老賊

吞滅盛壯色

如華髮枯朽

毀敗無所直

頂生王功德

共釋天王坐 報利福弘多 今日悉安在
此王天人中 欲樂具爲最 死時極苦痛
以此可悟意 諸欲初軟樂 後皆成大苦
亦如怨初善 減族禍在後 是身爲穢器
九孔常流惡 亦如那利瘡 絶治於醫藥
骨車力甚少 筋脉纏識轉 汝以爲妙乘
忍著無羞耻 死人所聚處 委棄滿塚間
生時所保惜 死則皆棄捐 常當念如是
一心觀莫亂 破癡倒黑瞋 執炬以明觀
若捨四念止 心無惡不造 如逸象無鉤

終不順調道 今日營此業 明日造彼事
樂著不觀苦 不覺死賊至 忽忽爲已務
他事亦不閑 死賊不待時 至則無脫緣
如鹿渴赴泉 以飲方向水 獵師無慈惠
不聽飲竟殺 癡人亦如是 勤修諸事務
死至不待時 誰當爲汝護 人心期富貴
五欲情未滿 諸大國王輩 無得免此患
仙人持呪箭 亦不免死王 無常大象蹈
蟻蛭與地同 且置一切人 諸佛正真覺
越度生死流 亦復不常在 以是故當知

汝所可愛樂 悉應早捨離 一心求涅槃
後捨身死時 誰當證知我 復得遇法寶
及以不遇者 久久佛日出 破大無明冥
以放諸光明 示人道非道 我從何所來
從何處而去 何處得解脫 此疑誰當明
佛聖一切智 久遠乃出世 一心莫放逸
能破汝疑結 彼不樂實利 好著弊惡心
汝爲衆生長 當求實法相 誰能知死時
所趨從何道 譬如風中燈 不知滅時節
至道法不難 大聖指事說 說智及智處
此二不假外 汝若不放逸 一心常行道
不久得涅槃 第一常樂處 利智親善人
盡心敬佛法 猥穢不淨身 離苦得解脫
閑靜修寂志 結跏坐林間 檢心不放逸
悟意覺諸緣 若不貳有中 安睡不自寤
不念世非常 可畏而不懼 煩惱深無底
生死海無邊 度苦船未辨 安得樂睡眠
是以當覺悟 莫以睡覆心 於四供養中
知量知止足 大怖俱未免 當宜勤精進
一切苦至時 悔恨無所及 祋衣坐樹下

如所應得食 勿爲貪味故 而自致毀敗
食過知味處 美惡都無異 愛好生憂苦
是以莫造愛 行業世界中 美惡無不更
一切已具受 當以是自抑 若在畜獸中
飼草爲具味 地獄吞鐵丸 然熱劇逆鐵
若生薜荔中 膳吐火糞尿 淚唾諸不淨
以此爲上味 若在天宮殿 七寶宮觀中
天食酥酡味 天女以娛心 人中豪貴處
七饌備衆味 一切曾所更 今復何以受
往返世界中 眇更苦樂事 雖未得涅槃

當勤求此利

學禪之人初至師所師應問言汝持戒淨不非重罪
惡邪不若言五衆戒淨無重罪惡邪次教道法若言
破戒應重問言汝破何戒若言重戒師言如人被截
耳鼻不須照鏡汝且還去精勤誦經勸化作福可種
後世道法因緣此生永棄譬如枯樹雖加溉灌不生
華葉及其果實若破餘戒是時應教如法懺悔若已
清淨師若得天眼他心智卽爲隨病說趣道之法若
未得通應當觀相或復問之三毒之中何者偏重姪
欲多耶瞋恚多耶愚癡多耶云何觀相若多姪相爲

人輕便多畜妻妾多語多信顏色和悅言語便易少
於瞋恨亦少愁憂多能技術好聞多識愛著文頌善
能談論能察人情多諸畏怖心在房室好著薄衣渴
欲女色愛著卧具服飾香華心多柔軟能有憐愍美
於言語好修福業意樂生天處衆無難別人好醜信
任婦女欲火熾盛心多悔變喜自莊飾好觀彩畫慳
惜已物僥倖他財好結親友不喜獨處樂著所止隨
逐流俗乍驚乍懼志如獮猴所見淺近作事無慮輕
志所爲趣得適意喜啼喜哭身體細軟不堪寒苦易
沮易悅不能忍事少得大喜少失大憂自發伏匿身

溫汗臭薄膚細髮多皺多白剪爪治鬚白齒趨行喜
潔淨衣學不專一好遊林苑多情多求意著常見附
近有德先意問訊喜用他語強顏耐辱聞事速解所
爲事業分別好醜愍傷苦厄自大好勝不受侵陵喜
行施惠接引善人得美飲食與人共之不在近細志
在遠大眼著色欲事不究竟無有遠慮知世方俗觀察
顏色逆探人心美言辯慧結友不固頭髮稀疎少
於睡眠坐卧行立不失容儀所有財物能速救急尋
後悔惜愛義疾得尋復喜忘惜於舉動難自改變難
得離欲作罪輕微如是種種是姪欲相瞋恚人相多

於憂惱卒暴懷忿身口麤廣能忍衆苦觸事不可多
愁少歡能作大惡無憐愍心喜爲鬪訟顏貌毀悴皺
眉睂睂難語難悅難事難可其心如瘡面宜人闕義
論強梁不可折伏難可傾動難親難沮含毒難吐受
誦不失多能多巧心不嬾惰造事疾成持望不語意
深難知受恩能報又能聚衆自伏事人不可沮敗能
究竟事難可干亂少所畏難譬如師子不可屈伏一
向不廻直造直進憶念不忘多慮思惟誦習憶持能
多施與小利不廻爲師利根離欲獨處少於姪欲心
常懷勝愛著斷見眼常惡視真實言語說事分了少

於親厚爲事堅著堅憶不忘多於筋力肩胸殊大廣
額齊髮心堅難伏疾得難忘能自離欲喜作重罪如
是種種是瞋恚相愚癡人相多疑多悔嬾惰無見自
滿難屈憒慢難受可信不信非信而信不知恭敬處
處信向多師輕躁無羞搪撲作事無慮反教狠戾不
擇親友不自修飾好師異道不別善惡難受易忘鈍
根懈怠訶謗行施心無憐愍破壞法橋觸事不了瞋
目不視無有智巧多求希望多疑少信憎惡好人破
罪福報不別壹言不能解過不受誨喻親離憎怨不知
禮節喜作惡口鬚髮爪長齒衣多垢爲人驅役畏

處不畏樂處而憂憂處而喜悲處反笑笑處反悲牽而後隨能忍苦事不別諸味難得離欲爲罪深重如是種種是愚癡相若多姪欲人不淨法門治若多瞋恚人慈心法門治若多愚癡人思惟觀因緣法門治若多思覺人念息法門治若多等分人念佛法門治諸如是等種種病種種法門治

第一 治姪欲法門

姪欲多人習不淨觀從足至髮不淨充滿髮毛爪齒薄皮厚皮血肉筋脈骨髓肝肺心脾腎胃大腸小腸屎尿洟唾汗淚垢疥膿胞膽痰水微膚脂肪臍膜身中如是種種不淨復次不淨觀者觀青瘀胖脹破爛血流塗漫臭膿噉食不盡骨散燒焦是謂不淨觀復次多姪人有七種愛或著好色或著端正或著儀容或著音聲或著細滑或著衆生或都愛著若著好色當習青瘀觀法黃赤不淨色等亦復如是若著端正當習胖脹身散觀法若著儀容當觀新死血流塗骨觀法若著音聲當習噎塞命斷觀法若著細滑當習骨觀及乾枯病觀法若愛衆生當習六種觀若都愛著一切偏觀或時作種種更作異觀是名不淨觀問曰若身不淨如臭腐屍者何從生著若著淨身臭

腐爛身亦當應著若不著臭身淨身亦應不著一身等故答求二實淨俱不可得人心狂惑爲顛倒所覆非淨計淨若顛倒心破便得實相法觀便知不淨虛誑不真復次死屍無火無命無識無有諸根人諦知心不生著以身有暖有命有識諸根完具心倒惑著復次心著色時謂以爲淨愛著心思卽知不淨若是實淨應當常淨而今不然如狗食糞謂之爲淨以人觀之甚爲不淨是身内外無一淨處若著身外身外薄皮舉身取之裁得如奈是亦不淨何況身內三十六物復次推身因緣種種不淨父母精血不淨合成

既得爲身常出不淨衣服牀褥亦臭不淨何況死處以是當知生死內外都是不淨此下經本至二門初復次淨觀亦有三品或初習行或已習行或久習行若初習行當教言作破皮想除却不淨當觀赤骨人繫意觀行不令外念外念諸緣攝念令還若已習行當教言想却皮肉盡觀頭骨不令外念外念諸緣攝念令還若久習行當教言身中一寸心却皮肉繫意五處頂上額上眉間鼻端心處如是五處住意觀骨不令外念外念諸緣攝念令還常念觀心心出制持若心疲極住念所緣捨外守住譬如獮猴被繫在柱極乃住息

所緣如柱念如繩鎖心喻獮猴亦如乳母常觀嬰兒
不令墮落行者觀心亦復如是漸漸制心令住緣處
若心久住是應禪法若得禪定卽有三相身體和悅
柔軟輕便白骨流光猶如白珂心得靜住是爲淨觀
是時便得色界中心是名初學禪法得色界心心應
禪法卽是色界法心得此法身在欲界四大極大柔
和快樂色澤淨潔光潤和悅是謂悅樂二者向者骨
觀白骨相中光明徧照淨白色三者心住一處是名
淨觀除肉觀骨故名淨觀如上三相皆自知之他所
不見上三品者初習行先未發意已習行三四身修

久習行百年身學

第二治瞋恚法門

若瞋恚偏多當學二種慈心法門或初習行或已習
行或久習行若初習行者當教言慈及親愛云何及
親願與親樂行者若得種種身心快樂寒時得衣熱
時得涼飢渴得飲食貧賤得富貴行極時得止息如
是種種樂願親愛得繫心在慈不令異念異念諸緣
攝之令還若已習行當教言慈及中人云何及中人
而願與樂行者若得種種身心快樂願中人得繫心
在慈不令異念異念諸緣攝之令還若久習行當教

言慈及怨憎云何及彼而與其樂行者若得種種身心快樂願怨憎得得與親同同得一心心大清淨親中怨等廣及世界無量衆生皆令得樂周徧十方靡不同等大心清淨見十方衆生皆如自見在心目前了了見之受得快樂是時卽得慈心三昧問曰親愛中人願令得樂怨憎惡人云何憐愍復願與樂答曰應與彼樂所以者何其人更有種種好事清淨法因我全云何豈可以一怨故而沒其善復次思惟是人過去世時或是我親善豆以今瞋便生怨惡我當忍彼是我善利又念行法仁德含弘慈力無量此不可

失復思惟言若無怨憎何因生忍生忍由怨怨則我之親善復次瞋報最重衆惡中上無有過是以瞋加物其毒難制雖欲燒他實是自害復自念言外被法服內習忍行是謂沙門豈可惡聲變色縱此蔽心復次五受陰者衆苦林藪受惡之的苦惱惡來何由可免如刺刺身刺有無量衆怨甚多不可悉除當自守護著忍革屣如佛言曰

以瞋報瞋 瞋還著之 瞋恚不報 能破大軍
能不瞋恚 是大人法 小人瞋恚 難動如山
瞋爲重毒 多所殘害 不得害彼 自害乃滅

瞋爲大瞋 有目無覩 瞪爲塵垢 染汙淨心
如是瞋毒 當急除滅 毒蛇在室 不除害人
如是種種 瞪恚無量 當習慈心 除滅瞋恚
是爲慈三昧門

第三治愚癡法門

若愚癡偏多當學三種思惟法門或初習行或已習行或久習行若初習行當教言生緣老死無明緣行如是思惟不令外念外念諸緣攝之令還若已習行當教言行緣識識緣名色名色緣六入六入緣觸觸緣受受緣愛愛緣取取緣有如是思惟不令外念外念諸緣攝之令還若久習行當教言無明緣行行緣識識緣名色名色緣六入六入緣觸觸緣受受緣愛愛緣取取緣有有緣生生緣老死如是思惟不令外念外念諸緣攝之令還問曰一切智人是有明一切愚人是無明是中云何無明答曰無明名一切不知此中無明能造後世有有者無無者有棄諸善取諸惡破實相著虛妄如無明相品中說

不明白蓋法 不知道德業 而作結使因
如火鑽燧生 惡法而心著 遠棄於善法
奪衆生明賊 去來明亦劫 常樂我淨想

計於五陰中 苦集盡道法 亦復不能知
種種惱險道 盲人入中行 煩惱故業集
業故苦流廻 不應取而取 應取而反棄
馳闍逐非道 跡株而躋地 有目而無慧
其喻亦如是 是因緣滅故 智明如日出
如是略說無明乃至老死亦如是問曰佛法中因緣
甚深云何癡多人能觀 因緣答曰二種癡人亦如牛
羊二種種邪見疑惑闇蔽邪見癡人佛爲此說當觀
因緣以習三昧

第四治思覺法門

若思覺偏多當習阿那般那三昧法門有三種學人
或初習行或已習行或久習行若初習行當教言一
心念數入息出息若長若短數一至十若已習行當
教言數一至十隨息入出念與息俱止心一處若久
習行當教言數隨止觀轉觀清淨阿那般那三昧六
種門十六分云何爲數一心念入息入息至竟數一
出息至竟數二若未竟而數爲非數若數二至九而
誤更從一數起譬如算人一一爲二二二爲四三三
爲九問曰何以故數答曰無常觀易得故亦斷諸思
覺故得一心故身心生滅無常相似相續難見入息

出息生滅無常易知易見故復次心繫在數斷諸思
覺思覺者欲思覺恚思覺惱思覺親里思覺國土思
覺不死思覺欲求淨心入正道者先當除却三種麤
病次除三種細病除六覺已當得一切清淨法譬如
採金沙先除麤石沙然後除細石沙次第得細金沙
問曰云何爲麤病云何爲細病答曰欲瞋惱覺是三
名麤病親里國土及不死覺是三名細病除此覺已
得一切清淨法問曰未得道者結使未斷六思覺強
從心生亂云何能除答曰心厭世間正觀能遮而未
能拔後得無漏道能拔結使根本何爲正觀

見多欲人求欲苦 得之守護是亦苦

失之憂惱亦大苦 心得欲時無滿苦

欲無常空憂惱因 衆共有此當覺棄

譬如毒蛇入人室 不急除之害必至

不定不實不貴重 種種欲求顛倒樂

如六神通阿羅漢 教誨欲覺弟子言

汝不破戒戒清淨 不共女人同室宿

欲結毒蛇滿心室 纏綿愛喜不相離

旣知身戒不可毀 而心常共欲火宿

汝是出家求道人 何緣縱心乃如是

父母生養長育汝
咸皆涕泣戀惜汝
而心常在欲覺中
常樂欲火共一處
如是種種訶欲覺如是種種正觀除欲覺問曰云何
減瞋恚覺答曰

從胎中來生常苦

是中衆生莫瞋惱

若念瞋惱慈悲滅

慈悲瞋惱不相比

汝念慈悲瞋惱滅

譬如明闇不同處

若持淨戒念瞋恚

是人自毀破法利

譬如諸象入水浴

復以泥土塗全身

一切常有老病死

種種鞭笞百千苦

云何善人念衆生

而復加益以瞋惱

若起瞋恚欲害彼

未及前人先自燒

是故常念行慈悲

瞋惱惡念內不生

若人常念行善法

是心常習佛所念

是故不應念不善

常念善法勸樂心

今世得樂後亦然

得道常樂是涅槃

若心積聚不善覺

自失已利并害他

旣自心中善法失

他有淨心亦復沒

宗親恩愛共成就

汝能捨離不顧念

而欲嬉戲無歡心

歡喜愛樂不暫離

常樂欲火共一處

歡喜愛樂不暫離

譬如阿蘭若道人 舉手哭言賊劫我
有人問言誰劫汝 答言財賊我不畏
我不聚財求世利 誰有財賊能侵我
我集善根諸法寶 覺觀賊來破我利
財賊可避多藏處 劫善賊來無處避
如是種種訶瞋恚如是種種正觀除瞋恚覺問曰云
何除惱覺答曰

世間衆生百千種 諸病更互恒來惱
死賊捕伺常欲殺 無量衆苦自沈沒
云何善人復加惱 謾謗謀害無慈仁

未及傷彼被殃身 俗人起惱是可恕
此事世法惡業固 亦不自言我修善
求清淨道出家人 而生瞋恚懷嫉心
清冷雲中放毒火 當知此惡罪極深
阿蘭若人與嫉妬 有阿羅漢他心智
教誡苦責汝何愚 嫉妬自破功德本
若求供養當自集 諸功德本莊嚴身
若不持戒禪多聞 虛假染衣壞法身
實是乞兒弊惡人 云何而求供養利
飢渴寒熱百千苦 衆生常因此諸惱

身心苦厄無窮盡

云何善人加諸惱

譬如病瘡以針刺

亦如獄囚拷未決

苦厄纏身衆惱集

云何慈悲更令劇

如是種種詞惱覺如是種種正觀除惱覺問曰云何除親里覺答曰應如是念世界生死中自業緣牽何者是親何者非親但以愚癡故橫生著心計爲我親過去世非親爲親未來世非親爲親今世是親過去非親譬如鳥柄暮集一樹晨則隨緣各自飛去家屬親里亦復如是生世界中各各自異心緣會故親緣散故蹤無有定實因緣果報共相親近譬如乾沙緣手團握緣捉故合緣放故散父母養子老當得報子蒙懷抱養育故應報若順其意則親若逆其意是賊有親不能益而反害有非親無損而大益人以因緣故而生愛愛因緣故而更斷譬如畫師作婦女像還自愛著此亦如是自生染著染著於外過去世中汝有親里今世於汝復何所作汝亦不能益過去親過去親不益汝兩不相益空念之爲是親非親世界中不定無邊如阿羅漢教新出家戀親弟子言如惡人吐食更欲還噉汝亦如是汝已得出家何以還欲愛著是剃髮染衣是解脫相汝著親里不得解脫還爲

愛所繫三界無常流轉不定若親非親雖今親里久
久則滅如是十方衆生廻轉親里無定是非我親人
欲死時無心無識直視不轉行氣命絕如墮闇坑是
時親里家屬安在若初生時先世非親今強和合作
親若當死時復非親里如是思惟不當著親如人兒
死一時三處父母俱時啼哭天上父母妻子謂人中
爲虛誑龍中父母亦以人中爲虛誑如是種種正觀
除親里覺問曰云何除國土覺答曰行者若念是國
土豐樂安隱多諸好人恒爲國土覺繩所牽將去罪
處覺心如是若有智人不應念著何以故國土種種
過罪所燒時節轉故亦有飢餓身疲極故一切國士
無常安者復次老病死苦無國不有從是間身苦去
得彼處身苦一切國土去無不苦假有國土安隱豐
樂而有結惱心生苦患是非好國土能除雜惡國土
能済結使令心不惱是謂好國土一切衆生有二種
苦身苦心苦常有苦惱無有國土無此二惱復次有
國土大寒有國土大熱有國土飢餓有國土多病有
國土多賊有國土王法不理如是種種國土之惡心
不應著如是正觀除國土覺問曰云何除不死覺答
曰應教行者若好家生若種族才伎力勢勝人一切

莫念何以故一切死時不觀老少貴賤才伎力勢是
身是一切憂惱諸因緣本自見少多壽若得安隱是
爲癡人何以故是謂憂惱本依是四大四大造色如
四毒蛇共不相應誰得安隱者出息期入是不可信
復次人睡時欲期必覺是事難信受胎至老死事恒
來求死時節言常不死云何可信譬如殺賊拔刀注
箭常求殺人無憐愍心人生世間死力最大一切無
勝死力強者若過去世第一妙人無能勝此死者現
在亦無大智人能勝死者亦非輒語求非巧言詭可
得避脫亦非特戒精進能却此死以是故當知人命

危脆不可怙恃莫信計常我當久活是諸死賊常將
人去不待老竟然後當殺如阿羅漢教諸覺所惱弟
子言汝何以不知厭世入道何以作此覺有人未生
便死有生時死者有乳哺時有斷乳時有小兒時有
盛壯時有老時一切時中間死法界譬如樹有華時
便墮有果時墮有未熟時墮是故應當勤力精進求
安隱道大力賊共住不可信此賊如虎巧覆藏身如
是死賊常求殺人世界所有空如水泡云何當言待
時入道阿誰能證言汝必老可得行道譬如險岸大
樹上有大風下有大水崩其根土誰當信此樹得久

住者人命亦如是少時不可信父如穀子母如好田先世因緣罪福如雨澤衆生如穀生死如收刈種種諸天子人王智德如天王佐天闡破諸阿須倫軍種種受樂極高大明還沒在黑闇以是故莫信命活言我今日當作此明後當作是如是種種正觀除不死覺如是先除麤思覺却後除細思覺心清淨先得正道一切結使盡從是得安隱處是謂出家果心得自在三業第一清淨不復受胎讀種種經多聞是時得果報如是得時不空破魔王軍便得第一勇猛名稱世界中煩惱將去是不名健能破煩惱賊滅三毒火

涼樂清淨涅槃林中安隱高枕種種禪定根力七覺清風四起顧念衆生沒三毒海妙力如是乃名爲健如是等散心當念阿那般那學六種法斷諸思覺以是故念數息問曰若餘不淨念佛等四觀中亦得斷思覺何以故獨數息答曰餘觀法寬難失故數息法急易轉故譬如放牛以牛難失故守之少事如放獮猴易失故守之多事此亦如是數息心數不得少時他念少時他念則失數以是故初斷思覺應數息已得數法當行隨法斷諸思覺入息至竟當隨莫數一出息至竟當隨莫數二譬如負債人債主隨逐初不

捨離如是思惟是入息是還出更有異出息是還入
更有異是時知入息異出息異何以故出息暖入息
冷問曰入出息是一息何以故出息還更入故譬如
令水水暖吐水水冷冷者還煖煖者還冷故答曰不
爾内心動故有息出出已卽滅鼻口引外則有息入
入故息滅亦無將出亦無將入復次少壯老人少者
入息長壯者入出息等老者出息長是故非一息復
次臍邊風發相似相續息出至口鼻邊出已便滅譬如
鞴囊中風開時卽滅若以口鼻因緣引之則風入
是從新因緣邊生譬如扇衆緣合故則有風是時知

入出息因緣而有虛証不真生滅無常如是思惟出
息從口鼻因緣引之而有入息因緣心動令生而惑
者不知以爲我息息者是風與外風無異地水火空
亦復如是是五大因緣合故生識識亦如是非我有
也五陰十二入十八界亦復如是如是知之逐息入
息出是以名隨已得隨法當行止法止法者數隨心
極住意風門念入出息問曰何以故止答曰斷諸思
覺故心不散故數隨息時心不定心多劇故止則心
閑少事故心住一處故念息出入譬如守門人門邊
住觀人入出止心亦爾知息出時從臍心胸咽至口

鼻息入時從口鼻咽胸心至脣如是繫心一處是名爲止復次心止法中住觀入息時五陰生滅異出息時五陰生滅異如是心亂便除却一心思惟令觀增長是名爲觀法捨風門住離麤觀法離麤觀法知息無常此名轉觀觀五陰無常亦念入息出息生滅無常見初頭息無所從來次觀後息亦無跡處因緣合故有因緣散故無是名轉觀法除滅五蓋及諸煩惱雖先得止觀煩惱不淨心雜今此淨法心獨得清淨復次前觀異學相似行道念息入出今無漏道相似行善有漏道是謂清淨復次初觀身念止分漸漸一切身念止次行痛心念止是中非清淨無漏道遠故今法念止中觀十六行念入出息得煖法頂法忍法世間第一法苦法忍乃至無學盡智是名清淨是十六分中初入息分六種安那般那行出息分亦如是一心念息入出若長若短譬如人怖走上山若擔負重若上氣如是比是息短若人極時得安息歡喜又如得利從獄中出如是爲息長一切息墮二處若長若短處是故言息長息短是中亦行安那般那六事念諸息徧身亦念息出入悉觀身中諸出息入息覺知徧至身中乃至足指徧諸毛孔如水入沙息出覺

知從足至髮徧諸毛孔亦如水入沙譬如鞴囊入出皆滿口鼻風入出亦爾觀身周徧見風行處如藕根孔亦如魚網復次非獨口鼻觀息入出一切毛孔及九孔中亦見息入息出是故知息徧諸身除諸身行亦念入出息初學息時若身懈怠睡眠體重悉除棄之身輕柔軟隨禪定心受喜亦念息入出除懈怠却睡眠心重得心輕柔軟隨禪定心受喜復次入身念止中竟次行痛念止已得身念止實今更得痛念止實受喜復次已知身實相今欲知心心數法實相是故受喜亦念息入出受樂亦念息入出是喜增長名爲樂復次初心中生悅是名喜後徧身喜是名樂復次初禪二禪中樂痛名喜三禪中樂痛名受樂受諸心行亦念息入出諸心生滅法心染法心不染法心散法心攝法心正法心邪法如是等諸心相名爲心行心作喜時亦念息入出先受喜自生不故作念心故作喜問曰何以故故作喜答曰欲治二種心或散心或攝心如是作心得出煩惱是故念法心作喜復次若心不悅勸勉令喜心作攝時亦念息入出設心不定強伏令定如經中說心定是道心散非道心作解脫時亦念息入出若意不解強伏令解譬如羊入

蒼耳蒼耳著身人爲漸漸出之心作解脫諸煩惱結亦復如是是名心念止作解脫觀無常亦念息入出觀諸法無常生滅空無吾我生時諸法空生滅時諸法空滅是中無男無女無人無作無受是名隨無常觀觀有爲法出散亦念息入出無常是名出散諸有爲法現世中出從過去因緣和合故集因緣壞故散如是隨觀是名出散觀觀離欲結亦念息入出心離諸結是法第一是名隨離欲觀觀盡亦念息入出諸結使苦在在處盡是處安隱是名隨盡觀觀棄捨亦念息入出諸染愛煩惱身心五陰諸有爲法棄捨是

第一安隱如是觀是名隨棄捨觀息入出是名數息十六分也第五法門治等分行及重罪人求索佛如是人等當教一心念佛三昧念佛三昧有三種人或初習行或已習行或久習行若初習行人將至佛像所或教令自往諦觀佛像相好相相明了一心憶持還至靜處心眼觀佛像令意不轉繫念在像不令他念他念攝之令常在像若心不住師當教言汝當責心由汝受罪不可稱計無際生死種種苦惱無不更受若在地獄吞飲洋銅食燒鐵丸若在畜生食糞噉草若在餓鬼受飢餓苦若在人中貧窮困厄苦若在

天上失欲憂惱常隨汝故令我受此種種身惱心惱無量苦惱今當制汝汝當隨我我今繫汝一處我終不復爲汝所困更受苦毒也汝常困我我今要當以事困汝如是不已心不敢亂是時便得心眼見佛像相光明如眼所見無有異也如是心住是名初習行者思惟是時當更念言是誰像相則是過去釋迦牟尼佛像相如我今見佛形像亦不來我亦不往如是心想見過去佛初降神時震動天地有三十二大人相一者足下安平二者足下千輻輪三者指長好四者足跟廣五者手足指合縵網六者足趺高平好

七者伊泥延鹿蹲八者平住手過膝九者陰馬藏相十者尼俱盧陀身十一者二孔一毛生十二者毛生上向而右旋十三者身色勝上金十四者身光面一丈十五者皮薄好十六者七處滿十七者兩腋下平好十八者上身如師子十九者身大好端直二十者肩圓好二十一者四十齒二十二者齒白齊密等而根深二十三者四牙白而大二十四者頰方如師子二十五者味中得上味二十六者舌大廣長而薄二十七者梵音深遠二十八者迦陵頻伽聲二十九者眼紺青色三十者眼睫如牛王三十一者頂髻肉

骨成三十二者眉間白毫長好右旋復次八十種小
相一者無見頂二者鼻直高好孔不現三者眉如初
生月紺琉璃色四者耳好五者身如那羅延六者骨
際如鉤鎖七者身一時迴如象王八者行時足去地
四寸而印文現九者爪如赤銅色薄而潤澤十者膝
圓好十一者身淨潔十二者身柔軟十三者身不曲
十四者指長圓纖十五者指紋如畫雜色莊嚴十六
者脉深不現十七者踝深不現十八者身光潤澤十
九者身自持不逶迤二十者身滿足五月受胎二月生二十
一者容儀備足二十二者住處安如牛王立不動二十三者

威震一切二十四者一切樂觀二十五者面不長二
十六者正容貌不捷色二十七者脣如頻夫針反婆果
色二十八者面圓滿二十九者響聲深三十者脣圓
深不出三十一者毛處處右旋三十二者手足滿三
十三者手足如意舊言内外握者是三十四者手足紋明直
三十五者手紋長三十六者手紋不斷三十七者一
切惡心衆生見者皆得和悅色三十八者面廣姝三
十九者面如月四十者衆生見者不怖不懼四十一
者毛孔出香風四十二者口出香氣衆生遇者樂法
七日四十三者儀容如師子四十四者進止如象王

四十五者行法如鵝王四十六者頭如磨陀羅果此果有六十種不圓不長四十七者聲分滿足聲有六十種分佛皆具足

四十八者牙

利四十九

無漢名故不得出也

五十者舌大而赤五十一者舌

薄五十二者毛純紅色色淨潔五十三者廣長眼五

十四者孔門滿九孔門相

五十五者手足赤白如蓮

華色五十六者腹不現不出五十七者不失腹五

八者不動身五十九者身重六十者大身身六十一

者身長六十二者手足滿淨六十三者四邊徧丈光

光明自照而行六十四者等視衆生六十五者不著

教化不貪弟子六十六者隨衆聲滿不減不過六

七者隨衆音聲而爲說法六十八者語言無礙六

九者次第相續說法七十者一切衆生日不吐諦視

相知盡七十一者視無狀足七十二者髮長好七

三者髮旋好七十四者髮不亂七十五者髮不破七

十六者髮柔軟七十七者髮青毗琉璃色七十八者

髮絞柔上七十九者髮不稀八十者胸有德字手足

有吉字光明徹照無量世界初生行七步發口演要

言出家勤苦行菩提樹下降伏魔軍後夜初明成等

正覺光相分明遠照十方靡不周徧諸天空中弦歌

供養散華雨香一切衆生咸敬無量獨步三界還顧

轉身如象王廻觀視道樹初轉法輪天人得悟以道
自證得至涅槃佛身如是感發無量專心念佛不令
外念外念諸緣攝之令還如是不亂是時便得見一
佛二佛乃至十方無量世界諸佛色身以心想故皆
得見之既得見佛又聞說法言或自請問佛爲說法
解諸疑網既得佛念當復念佛功德法身無量深慧
無崖底智不可計德多陀阿伽度多陀此言如阿伽度言解亦言實語
又言諸餘聖人安隱道來佛如是來復次更不來後有也阿黎魯迷切呵阿黎此言殺
佛以忍辱爲鎧精進爲堅牢禪定爲弓智慧爲箭殺橋慢等賊故云殺賊也三藐無灼切三藐因習涅槃此言真實三佛陀言一切覺覺苦因習涅槃因道正解見四實不可轉了盡無餘故言真

真覺
一切
鞞伽除夜切遮羅那鞞多此言明遮羅那言善行明三明也行清淨之行獨成無師大覺故

言明善行也三般那此言善解亦名善

惠路伽憊夫拜切路伽此言智者知世因知盡道故名世智知世也

阿耨多羅此言大慈大悲大福故有輒美語

沙曇藐富樓沙此言可化言可化丈夫曇藐言可化夫調御師佛以大慈大悲大福故有輒美語

婆過去未來現在不行知行盡不盡一切諸法菩

提婆提婆下一切了知故名佛婆伽婆言有大名聲

復次婆伽名女根婆名吐承棄女根故女根吐者也爾時復念二佛神德三四五佛乃至無量盡虛空界皆悉如是復還見一佛能

見一佛作十方佛能見十方佛作一佛能令一色作
金銀水精毗瑠璃色隨人意樂悉令見之爾時唯觀
三事虛空佛身及佛功德更無異念心得自在意不
馳散是時得成念佛三昧若行者心馳散念在五塵
及六思覺者當自助勉勵其心強制伏之如是思
惟人身難得佛法難遇故曰衆明日爲最諸智佛爲
最所以者何佛興大悲常爲一切故頭目髓腦救濟
衆生何可放心不專念佛而辜負重恩若佛不出世
則無人道天道涅槃之道若人香華供養以骨肉血
髓起塔供養未若行人以法供養得至涅槃雖然猶
負佛恩設當念佛空無所獲猶應勤心專念不忘以
報佛恩何況念佛得諸三昧智慧成佛而不專念是
故行者常當專心令意不散既得見佛請決所疑是
名曰念佛三昧除滅等分及餘重罪

坐禪三昧法門經卷上

音釋

垤	徒結切	巒	封也	迸	必孟切	眊	睞也	睞力代切	糖	搘	搘音
唐	突	很	很	胡瞿切	戾	郎計	睞也	睞音	鑽	燧	鑽音
燧	徐醉切	燧	不聽從也	烬	音憂	垢	垢也	垢音	鑽	燧	鑽官切
謂穿木取火也	胡瓦切	跟	根	蒲拜	市充切	蹠	蹠也	蹠旁毛也	蹠	蹠	蹠日切
足骨也	絞切	古巧	僕	奴候					蹠	蹠	

歸安居士嚴爾珪施賈刻
坐禪三昧法門經卷上 計字一萬四百四十
六箇該銀五兩二錢二分三厘
伏願六根雪淨三障冰清卽生啓悟妙心世世
弘開道眼 龍山釋海瓊對
崇禎五年孟秋月徑山化城寺識

坐禪三昧法門經卷下

僧伽羅利造
姚秦法師譯

爾時行者雖得一心定力未成猶爲欲界煩惱所亂
當作方便進學初禪訶棄愛欲云何訶棄觀欲界過
欲爲不淨種種不善當念初禪安隱快樂觀欲云何
知欲無常功德怨家如幻如化空無所得念之未得
癡心已亂何況已得姪欲纏覆天上樂處猶不常安
何況人中人心著欲無有狀足如火得薪如海吞流
如頂生王雖雨七寶王四天下帝釋分座猶不知足

如那睺沙姓也轉金輪王爲欲所逼墮蟒蛇中又如仙

人食果衣草隱居深山被髮求道猶復不免欲賊所
壞欲樂甚少怨毒甚多著欲之人惡友相近善人疎
遠欲爲毒酒愚惑醉死欲爲欺誑走使愚人疲苦萬
端不得自在唯有離欲身心安隱快樂無極欲無所
得如狗敵枯骨求欲勤勞極苦乃得得之甚難失之
甚易如假借須臾勢不得久如夢所見恍惚卽滅欲
之爲患求時旣苦得之亦苦多得多苦如火得薪多
益多熾欲如段肉衆鳥競逐以要言之如蛾赴火如
魚吞鉤如鹿逐聲如渴飲鹹水一切衆生爲欲致患

無苦不至是故當知欲爲毒害當求初禪滅斷欲火
行者一心精勤信樂令心增進意不散亂觀欲心厭
除結惱盡得初禪定離欲盛火得清涼定如熱得陰
如貧得富是時便得初禪喜覺思惟禪中種種功德
觀分別好醜便得一心問曰修行禪人得一心相云
何可知答曰面色悅澤徐行靖正不失一心目不著
色神德定力不貪名利擊破惰慢其性柔軟不懷毒
害無復慳嫉直信心淨論議不諍身無欺誑易可與
語柔軟慚愧心常在法勤修精進持戒完具誦經正
憶念隨法行意常喜悅瞋處不瞋四供養中不淨不

受淨施則受知量止足寤起輕利能行二施忍辱除邪論議而不自滿言語尠少謙恪恭敬上中下座善師善知識親近隨順飲食知節不著好味樂獨靜處若苦若樂心忍不動無怨無競不喜鬪訟如是種種相得知一心相如是得入初禪觀分別好醜知此覺觀二事亂禪定心如水澄靜波蕩則濁行者如是內以一心覺觀所惱如極得息如睡得安是時次學無覺無觀生清淨定內淨喜樂得入二禪心靜默然本所不得今得此喜是時心觀以喜爲患如上覺觀行無喜法離捨喜地得賢聖樂一心諦知念護得入三

禪已棄喜故諦知憶念樂護聖人言樂護餘人難捨樂中第一過此以往無復樂也是故一切至人於一切淨地中說慈爲第一樂樂則是患所以有何第一禪中心不動轉以無事故有動則有轉有轉則有苦是故三禪以樂爲患欲以善妙捨此苦樂先棄憂喜除苦樂意護念清淨入第四禪不苦不樂護清淨念一心是故佛言護最清淨名第四禪以第三禪樂動故名之爲苦是故四禪除滅苦樂名不動處漸觀空處破内外色想滅有對想不念種種色想觀無量空處常觀色過念空處定上妙功德習念是法逮得空

定念無量識處觀空處過念無量識處功德習念是法逮得識定念無所有處觀識處過念無所有處功德習念是法便得無所有處念非有想非無想處若一切想其患甚多若病若瘡若無想是愚癡處是故非有想非無想是第一安隱善處觀無所有處過念非有想非無想功德習念是法便得非有想非無想處或有行者先從初地乃至上地復於上地習行慈心先自得樂破瞋恚毒次及十方無量衆生是時便得慈心三昧悲心憐愍衆生之苦能破衆惱廣及無量衆生是時便得悲心三昧能破不悅令無量衆生

皆得喜悅是時便得喜心三昧能破苦樂直觀十方無量衆生是時便得護心三昧二禪亦復如是三禪四禪除喜次學五通身能飛行變化自在行者一心欲定精進定一心定慧定一心觀身常作輕想欲成飛行若大若小以欲定過爲大以欲定減爲小此二俱患精進翹勤常能一心思惟輕觀如能浮人心欲強故而不沈沒亦如猿猴從高上墮心力強故身無痛患此亦如是欲力精進力一心力慧力令其廣大而身更小便能運身復次觀身空界常習此觀欲力精進力一心力慧力

極爲廣大便能舉身如大風力致重遠此亦如是
初當自試離地一尺二尺漸至一丈還來本處如鳥
子學飛小兒學行思惟自審知心力大必能至遠學
觀四大除却地大但觀三大心念不散便得自在身
無罣礙如鳥飛行當復學習遠作近想是故近減遠
出復能變化諸物如觀木地種除却餘種此木便變
爲地所以者何木有地種分故水火風空金銀寶物
悉皆如是何以故木有諸種分故是初神通根本四
禪有十四變化心初禪二果一者初禪二者欲界二
禪三果一者二禪二者初禪三者欲界三禪四果一

者三禪二者二禪三者初禪四者欲界四禪五果一
者四禪二者三禪三者二禪四者初禪五者欲界餘
通摩訶衍論中說世尊弟子學五法門志求涅槃有
二種人或好定多以著樂故或好智多畏苦患故定
多者先學禪法後學涅槃智多者直趣涅槃直趣涅
槃者未斷煩惱亦未得禪專心不散直求涅槃越愛
等煩惱是名涅槃身實無常苦不淨無我心顛倒故
常樂淨我以是故事事愛著其身是則底下衆生行
者欲破顛倒故習四念止觀觀身種種多諸苦患從
因緣生故無常種種惱故苦身有三十六物故不淨

以不得自在故無我習如是觀觀內身觀外身觀外身習如是觀是謂身念止實相如是何故於此而起顛倒愛著此身諦思惟念身邊樂痛以愛樂痛故著此身當觀樂痛實不可得云何不可得因衣食故致樂樂過則苦生非實樂故如患瘡苦以藥塗治痛止爲樂以大苦故謂小苦爲樂非實樂也復次以故苦爲苦新苦爲樂如擔重易肩肩輕爲樂而以新重爲樂實非樂也如火性熱無暫冷時若是實樂不應有不樂時或曰外事是樂因緣不必是樂或時樂因或時苦因若使心法與愛相應爾時是樂與恚相應爾時是苦與癡相應不苦不樂以此可知有樂無樂耶答曰無也姪欲不應是樂何以故若姪欲在內不應外求女色外求女色當知姪苦若姪是樂不應時棄若棄非樂也於大苦中小苦爲樂也如人應死全命受鞭以是爲樂欲心熾盛以欲爲樂老時厭欲知欲非樂若實樂相不應生厭種種因緣欲樂相實不可得失樂則苦佛言樂痛應觀苦苦痛應觀樂如箭在體不苦不樂應觀生滅無常是謂痛念止當知心受苦樂受不苦不樂云何心是心無常從因緣生故生滅不住相似生故但顛倒故謂是爲一本無今

有已有還無是故無常觀知心空云何爲空從因緣生有眼有色有色可見憶念欲見如是等和合生眼識如日愛珠有日有珠乾草牛屎衆緣和合於是生火一一推求火不可得緣合有火眼識亦爾不住眼中亦非色中住不兩中間住無有住處亦復不無是故佛言如幻如化現在心觀過去心或苦或樂或不苦不樂心各各異各各滅有欲心無欲心亦如是各各異各各滅觀内心觀外心觀內外心亦如是名心念止復次觀心屬誰觀想思憶念欲等諸心相應法不相應法諦觀其主主不可得何以故從因緣生

故無常無常故苦苦故不自在不自在故無主無主故空前別觀身痛心法不可得今更總觀四念止中主不可得離此處求亦不可得若常不可得無常亦不可得若常應當常苦常樂亦不應忘若常有神者無殺憍罪亦無涅槃若身是神無常身滅神亦應滅亦無後世亦無罪福如是徧觀無主諸法皆空不自在因緣合故生因緣壞故滅如是緣合法是名法念止若行者得法念止厭世間空老病死法都無少許常樂我淨於我此空法復何所求應當入涅槃最善法中住建精進力得深舍摩陀故深舍摩陀者住心一處名也此土無

是得深舍摩陀住第四法念止中觀諸法相皆苦無樂無樂是實餘者妄語是苦因愛等煩惱及業是非天非時非塵等種種妄語中生是煩惱及業出生此苦是苦入涅槃時一切滅盡非色無色界及世界始外道謂一切有法之初名爲世界始外道謂涅槃以有始能化作萬物卽名造化也等種種妄語能滅此苦正見等八直道是涅槃道非餘斷食等種種苦行亦非種種空持戒空禪定空智慧何以故佛法中戒定慧三法合行能入涅槃

譬如人立平地持好弓箭能射殺怨賊三法合行亦如是戒爲平地禪定爲快弓智慧爲利箭三事備足

能殺煩惱賊是故外道輩不得涅槃行者是時作四法緣觀緣如射博觀苦四種因緣生故無常身心惱故苦無一可得故空無作無受故無我觀集四種煩惱有漏業和合故集相似果生故因是中得一切行故生非相似果相續故緣觀盡四種一切煩惱覆故閉除煩惱火故滅一切法中第一故妙世間過去故出觀道四種能到涅槃故道不顛倒故正一切聖人去處故跡得脫世愁惱故離如是觀者得無漏相似法名爲煥法云何名煥常勤精進故名煥法諸煩惱薪無漏智火燒火欲出初相名爲煥法譬如鑽火初

鑽煙出是名爲煖是爲涅槃道初相佛弟子中有二種人一者多好一心求禪定是人有漏道二者多除愛著好實智慧直趣涅槃入煖法中有煖相者深得一心實法鏡到無漏界邊鏡中像似面界邊非中故以爲喻行者是時大得安隱自念我定當得涅槃以見此道故如人穿井得至濕泥知當得水不久如人擊賊賊已退散

自知得勝意中安隱譬如病人怖死人欲知活不當先試之以杖打身若癢脢脉起知是有煖必可得活亦如聽法人思惟喜悅心著是時心熱行者如是有煖法故名爲有煖亦名能得涅槃分善根是善根法

有十六行四諦緣六地中一智慧一切無漏法基野人能行安隱於無漏疎故名爲野人是名有煖法增進轉上更名頂法如乳變爲酪是人觀諸法實相我當離苦得解脫門心愛是法是爲真法能除種種苦患及老病死是時思惟此法誰說是佛世尊從是得佛寶中信心清淨大歡喜悅若無此法一切煩惱誰當能遮我當云何得實智慧少許明從是得法寶中信心清淨大歡喜悅若我不得佛弟子輩好伴云何當得實智慧少許明從是得僧寶中信心清淨大歡喜悅是三寶中一心清淨合實智慧是頂善根亦名頂法亦名

能得涅槃分善根亦如波羅延經中說

佛寶法僧寶 誰有少信淨 是名頂善根

汝曹一心持

云何爲少信於菩薩辟支佛阿羅漢邊爲少於野人邊爲多復次此可破可失是故名少如法句說

芭蕉生實死 竹生實亦然 駃姪子則死

小人得養死 破失非利故 小人得名譽

白淨分失盡 乃至頂法墮

復次未斷諸結使未得無漏無量慧心以是故名少復次勤精進一心入涅槃道中更了了觀五陰四諦

十六行是時心不縮不悔不退愛樂入忍是名忍善根忍何等隨四諦觀行是名爲忍是善根三種上中下三時云何名忍觀五陰無常苦空無我心忍不退是名忍復次觀諸世間盡空無有樂是苦因集愛等諸煩惱集智緣盡是名上法更無有上八直道能令行人得至涅槃更無有上信心如是不悔不疑忍是名忍是中更有忍種種結使種種煩惱疑悔來入心中不能令破譬如石山種種風水不能漂動是故名忍是事得名真好野人如佛說法句中

世界正見上 誰有得多者 乃至千萬歲

終不墮惡道

是世間正見是名爲忍善相是人多增進一心極狀
世界行欲了了四諦相作證趣涅槃如是一心中是
名世間第一法一時住四行無常苦空無我觀一諦
苦法忍苦緣故何以故觀欲界五受陰無常苦空無
我是中心忍入慧亦是心相應心心數法是名苦法
忍身業口業及心不相應行現在未來世一切無漏
法初門是名苦法忍法無漏法忍信受也次第生苦法智苦法
忍斷結使苦法智作證譬如一人能刈一人能束如
刀斫竹得風卽偃忍智功夫故是事得辦欲界繫見

苦斷十結得爾時異等智得以無漏智未得無漏慧
得是時成就一等智等智未來成就第二心中成就法智苦
智等智過第三心第四心成就四智苦智法智比智
等智集盡道法中一一智增離欲人知他心智成就
增苦比忍苦比智斷十八結是四心苦諦能得集法
忍集法智斷欲界繫七結集比智斷色無色
界繫十二結盡法忍盡法智斷欲界繫七結盡比忍
盡比智斷色無色界繫十二結道法忍道法智斷欲
界繫八結道比忍道比智斷色無色界繫十四結道
比智是名須陀般那此言流入涅槃實知諸法相是十六心

能十五心中利根名隨法行鈍根名隨信行是二人
未離欲名初果向先未斷結得十六心名須陀般那
若先斷六品結得十六心名息忌陀伽迷此言不來先未離欲斷
八十八結故名須陀般那復次無漏果善根得得故
名須陀般那利根名見得鈍根名信愛思惟結未斷
餘殘七世生若思惟結三種斷名家家三世生聖道
八分三十七品名流向涅槃隨是流行故名須陀般
那是佛初功德子得脫惡道斷三結薄三毒名息忌
陀伽迷復次欲界結九種上上上中上下中上中見
中中下下上下中下中下見

諦斷思惟斷

若凡夫人先以有漏道斷欲界繫六種結入見諦道
十六心中得名息忌陀伽迷若八種斷入見諦道第
十六心中一種名息忌陀伽迷果向阿那伽迷是思
弟子得須陀般那單斷三結欲得息忌陀伽迷是思
惟斷欲界繫九種結六種斷是名息忌陀伽迷八種
斷是名一種息忌陀伽迷果向阿那伽迷若凡夫人
先斷欲界繫九種結入見諦道第十六心名阿那伽
迷若得息忌陀伽迷進斷三種思惟結第九解脫道
名阿那伽迷阿那伽迷有九種今世必入涅槃阿那

伽迷中陰入涅槃阿那伽迷生已入涅槃阿那伽迷勤求入涅槃阿那伽迷不勤求入涅槃阿那伽迷上行入涅槃阿那伽迷至阿迦尼吒入涅槃阿那伽迷到色無色定入涅槃阿那伽迷身證阿那伽迷行向阿羅漢阿那伽迷色無色界九種結以第九無礙道金剛三昧破一切結第九解脫道盡智修一切善根是名阿羅漢果是阿羅漢有九種退法不退法死法守法住法必知法不壞法慧脫共脫喪智喪進行五種法退是名退法利智利進行五種法不退是名不退法喪智喪進行利歟思惟自殺身是名死法喪智大進自護身是名守法中智中進不增不減處中而住是名住法少利智勤精進能得不壞心解脫是名必知法利智大進初得不壞心解脫是名不壞法不能入諸禪未到地中諸漏盡是名慧解脫得諸禪亦得滅禪諸漏盡是名共解脫有阿羅漢一切有爲法常狀滿足更不求功德待時入涅槃有阿羅漢求四禪四無色定四等心八解脫八勝處十一切入九次第

六神通願智阿蘭若那三昧此言無諍阿蘭若言無諍事或言空寂舊言須苦提常行空寂行非也自是無諍行無諍者將護衆生不令起諍於我起諍如舍利弗日連入陶屋中宿致拘迦離起諍者是也超越三昧熏禪三解脫門及放捨三昧門空無願

更住利智勤精進入如是諸禪功德是名得不退
相無法不壞法若佛不出世無佛法無弟子時是時離欲
人辟支佛出辟支佛有三種上中下下者本得須陀
般那若息忌陀伽迷是須陀般那於七世生人中是
時無佛法不得作弟子復不應八世生是時作辟支
佛若息忌陀伽迷二世生時是時無佛法不得作弟
子復不應三世生是時作辟支佛有人願作辟支佛
種辟支佛善根時無佛法善根熟爾時眾世出家得
道名辟支佛是名中辟支佛有人求佛道智力盡力
少以因緣退如舍利弗退也是時佛不出世無佛法亦無弟

子而善根行熟作辟支佛有相好若少若多眾世出
家得道是名上辟支佛於諸法中智慧淺入名阿羅
漢中入名辟支佛深入名佛如遙見樹不能分別枝
葉小近能分別枝葉不能分別華葉到樹下盡能別
知樹枝華葉實聲聞能知一切諸行無常一切諸法
無主惟涅槃善安隱聲聞能如是觀不能分別深入
深知辟支佛少能分別不能深入深知佛知諸法分
別究竟深入深知也如波羅奈國王夏熱時處高樓
上坐七寶牀令青衣磨牛頭栴檀香塗身青衣臂多
著釤摩王身時釤聲滿耳王甚患之次第令脫釤少

聲微唯獨一剴寂然無聲王時悟曰國家臣民宮人
綵女多事多惱亦復如是卽時離欲獨處思惟得辟
支佛鬚髮自落著自然衣從樓閣去以已神足力出
家入山如是因緣中品辟支佛也若行者入求佛道
入禪先當繫心專念十方三世諸佛生身莫念地水
火風山樹草木天地之中有形之類及諸餘法一切
莫念但念諸佛生身處在虛空譬如大海清水中央
金山王須彌如夜闇中然大火如大施祠中七寶幢
佛身如有二十二相八十種好常出無量清淨光明
於虛空相青色中常念佛身相如是行者便得十

方三世諸佛悉在心目前一切悉見三昧若心餘處
緣還攝令住念在佛身是時便見東方三百千萬億
種無量諸佛如是南方西方北方四維上下隨所念
方見一切佛如人夜觀星宿百千無量種星宿悉見
菩薩得是三昧除無量劫厚罪令薄薄者令滅得是
三昧已當念佛種種無量功德一切智一切解一切
見一切德得大慈大悲自在自初出無明翳四無畏
五眼十力十八不共法能除無量苦救老死畏與常
樂涅槃佛有如是等種種無量功德作是念已自發
願言我何時當得佛身佛功德巍巍如是復作大誓

過去一切福現在一切福盡持求佛道不用餘報復
作是念一切衆生甚可憐愍諸佛身功德巍巍如是
衆生云何更求餘業而不求佛譬如貴家盲子墮大
深坑飢窮困苦食糞食泥父甚愍之爲求方便拯之
於深坑飼之以上饌行者念言佛二種身功德甘露
如是而諸衆生墮生死深坑食諸不淨以大悲心我
當拯濟一切衆生令得佛道度生死岸以佛種種功
德法味悉令飽滿一切佛法願悉得之聞誦持問觀
行得果爲作階梯立大要誓被三願鎧外破魔衆內
擊結賊直入不廻如是三願比無量諸願願皆住之

爲度衆生得佛道故如是念如是願是爲菩薩念佛
三昧行菩薩道者於三毒中若姪欲偏多先自觀身
骨肉皮膚筋脈流血肝肺腸胃屎尿湆唾三十六物
九想不淨專心內觀不令外念外念諸緣攝之令還
如人執燭入雜穀倉種種分別豆麥黍粟無不識知
復次觀身六分堅爲地分濕爲水分熱爲火分動爲
風分孔爲空分知爲識分亦如屠牛分爲六分身首
四肢各自異處身有九孔常流不淨革囊盛屎常作
是觀不令外念外念諸緣攝之令還若得一心意生
獸患求離此身欲令速滅早入涅槃是時當發大慈

大悲以大功德拔濟衆生興前三願以諸衆生不知不淨起諸罪垢我當拔置於甘露地復次欲界衆生樂著不淨如狗食糞我當度脫至清淨道復次我當學求諸法實相不有常不無常非淨非不淨我當云何著此不淨觀此不淨智從因緣生如我法者當求實相云何狀患身中不淨而取涅槃當如大象度駛流水窮盡源底得實法相而入涅槃豈可如獮猴諸免畏怖駛流趣自度身我今當學如菩薩法行不淨觀除却姪欲廣化衆生令離欲患不爲不淨觀所狀沒復次旣觀不淨則狀生死當觀淨門繫心三處鼻

端眉間額上當於是中開一寸皮淨除血肉繫心白骨不令外念外念諸緣攝之令還著三緣中恒與心鬪如二人相撲行者若勝心則不如制之令住是名一心若以狀患起大悲心愍念衆生爲此空骨遠離涅槃入三惡道我當勤力作諸功德教化衆生令解身相空骨以薄皮覆實聚不淨爲衆生故徐當分別此諸法相有少淨相心生愛著不淨相多心生狀患有出法相故生實法諸法相中無淨無不淨亦無閉亦無出觀諸法等不可壞不可動是名諸法實相

出過羅漢行菩薩道者若瞋恚偏多當行慈心念東方衆法也

生慈心清淨無怨無恚廣大無量見諸衆生悉在目前南西北方四維上下亦復如是制心行慈不令外念外念異緣攝之令還持心目觀一切衆生悉見了皆在目前若得一心當發願言我以涅槃實清淨法度脫衆生使得實樂行慈三昧心如此者是菩薩道住慈三昧以觀諸法實相清淨不壞不動願令衆生得此法利以此三昧慈念東方一切衆生使得佛樂十方亦爾心不轉亂是謂菩薩慈三昧門問曰何不一時總念十方衆生答曰先念一方一心易得然後次第周徧諸方問曰人有怨家恒欲相害云何行

慈欲令彼樂答曰慈是心法出生於心先從所親所親轉增乃及怨家如火燒薪盛能然濕問曰或時衆生遭種種苦或在人中或地獄中菩薩雖慈彼那得樂答曰先從樂人取其樂相令彼苦人得如彼樂如敗軍將怖懼失瞻視彼敵人皆謂勇士問曰行慈三昧有何善利答曰行者自念出家離俗應行慈心又思惟言食人信施宜行利益如佛所言須臾行慈是隨佛教則爲入道不空受施復次身著染服心應不染慈三昧力能令不染復次我心行慈於破法世我有法人非法衆中我有法人知法無惱慈定力故菩

薩行道趣甘露門種種熱惱慈涼冷樂如佛所言人
熱極時入清涼池樂復次被大慈鎧遮煩惱箭慈爲
法藥消怨結毒煩惱燒心慈能除滅慈爲法梯登解
脫臺慈爲法船度生死海求善法財慈爲上寶行趣
涅槃慈爲道糧慈爲駿足度入涅槃慈爲猛將越三
惡道能行慈者消伏衆惡諸天善神常隨擁護問曰
若當行人得慈三昧云何不失而復增益答曰學戒
清淨喜信猗樂學諸禪定一心智慧樂處閑靜常不
放逸少欲知足行順慈教節身少食減損睡眠初夜
後夜思惟不廢省煩言語默然守靜坐卧行住知時

消息不令失度致疲苦極調和寒溫不令惱亂是謂
益慈復次以佛道樂涅槃之樂與一切人是名大慈
行者思惟現在未來大人行慈利益一切我亦蒙濟
是我良祐我當行慈畢報施恩復更念言大德慈心
愍念一切以此爲樂我亦當爾念彼衆生令得佛樂
涅槃之樂是爲報恩復次慈力能令一切心得快樂
身離熱惱得清涼樂持行慈福念安一切以報其恩
復次慈有善利斷瞋恚法開名稱門施主良田生梵
天因生離欲處除却怨對及鬪諍恨諸佛稱揚智人
愛敬能持淨戒生智慧明能聞法利功德醍醐決定

好人出家猛力消滅諸惡罵辱不善慈報能伏結集
悅樂生精進法富貴根因辯智慧府誠信庫藏諸善
法門致稱譽法敬畏根本佛正真道若人持惡向之
還自受其殃五種惡語非時語非實語非利語非慈
語非軟語是五惡語不能傾動一切毒害亦不能傷
譬如小火不能熟大海此下應出優填王持五百發箭如毗羅經中

優填王阿婆陀那說有二夫人一名無比二名舍迷
婆帝無比誹謗舍迷婆帝舍迷婆帝有五百直人王
以五百箭欲一一射殺之舍迷婆帝語諸直人在我
後立是時舍迷婆帝入慈三昧王挽弓射之箭墮足

下第二箭還向王脚下王大驚怖復欲放箭舍迷婆
帝語王言止止夫婦之義是故相語若放此箭當直
破汝心王時恐畏投弓捨射問言汝有何術答言我
無異術我是佛弟子入慈三昧故也是慈三昧略說
有三種緣生緣法緣無緣諸未得道是名生緣阿羅
漢辟支佛是名法緣諸佛世尊是名無緣是略說慈
三昧門行菩薩道者於三毒中若愚癡偏多當觀十
二分破二種癡內破身癡外破衆生癡思惟念言我
及衆生俱在厄難常生常老常病常死常滅常出衆
生可憐不知出道從何得脫一心思惟生老病死從

因緣生當復思惟何因緣生一心思惟生因緣有有
因緣取取因緣愛愛因緣受受因緣觸觸因緣六入
六入因緣名色名色因緣識識因緣行行因緣癡如
是復思惟當何因緣滅生老死一心思惟生滅故老
死滅有滅故生滅取滅故有滅愛滅故取滅受滅故
愛滅觸滅故受滅六入滅故觸滅名色滅故六入滅
識滅故名色滅行滅故識滅癡滅故行滅此中十二
分云何無明分不知前不知後不知前後不知內不
知外不知內外不知佛不知法不知僧不知苦不知
集不知盡不知道不知業不知果不知業果不知因

不知緣不知因緣不知罪不知福不知罪福不知善
不知不善不知善不善不知有罪法不知無罪法不
知應近法不知應遠法不知有漏法不知無漏法不
知世間法不知出世間法不知過去法不知未來法
不知現在法不知黑法不知白法不知分別因緣法
不知六觸法不知實證法如是種種不知不慧不見
闇黑無明是名無明無明緣行云何名行行有三種
身行口行意行云何身行入息出息是身行法所以
者何是法屬身故名身行云何口行有覺有觀是作
覺觀已然後口語若無覺觀則無言說是謂口行云

何意行痛想

痛名世界人所著三種痛應爲受受想出家所患也

是意法繫屬意故是名意行復次欲界繫行

色界繫行無色界繫行復次善行不善行不動行云

何善行欲界一切善行亦色界三地云何不善行諸不善法云何不動行第四禪有漏善行及無色定善

有漏行是名行行因緣識云何名識六種識界眼識

乃至意識是名六識識因緣名色云何爲名無色四

分痛想行識是謂名云何爲色一切色四大及造色

是謂色云何四大地水火風云何地堅重相者地輒

濕相者水熟相者火輕動相者風餘色可見有對無

對是名造色名色和合是謂名色名色因緣六入云

何六入內六入眼內入乃至意內入是名六入六入

因緣觸云何觸六種觸界眼觸乃至意觸云何眼觸

眼緣色生眼識三法和合是名眼觸乃至意觸亦復

如是觸因緣受云何受三種受樂受苦受不苦不樂受

受云何樂受愛使云何苦受恚使云何不苦不樂受

恚使復次樂受愛使生樂滅苦苦受生苦住苦滅樂

不苦不樂受不知苦不知樂受因緣愛云何愛眼觸

色生愛乃至意觸法生愛愛因緣取云何取欲取見

取戒取我語取取因緣有云何有三種有欲有色有

無色有下從阿鼻大泥犁上至他化自在天是名欲
有及其能生業云何色有從下梵世上至阿迦尼吒
天是名色有云何無色有從虛空乃至非有想非無
想處是名無色有有因緣生云何生種種衆生處處
生出有受陰得持得入得命是名生生因緣老死云
何老齒落髮白多皺根熟根破氣噎身僂拄杖行步
陰身朽故是名老云何死一切衆生處處退墮滅斷
死失壽命盡是名死先老後死故名老死是中十二
因緣一切世間非無因緣非天邊非人邊非種種等
邪緣邊出菩薩觀十二因緣繫心不動不令外念外
念諸緣攝之令還觀十二分生三世中前生今生後
生菩薩若得心住當觀十二分空無有主癡不知我
作行行不知我從癡有但無明緣故行生如草木種
從子芽出子亦不知我生芽芽亦不知從子出乃至
老死亦復如是是十二分中一一觀知無主無我如
外草木無主但從倒見計有吾我問曰若無吾我無
主無作云何去來言說死此生彼答曰雖無吾我六
情作因六塵作緣中生六識三事和合故觸法生念
知諸業出是去來言說從是有生死譬如日愛珠日
乾牛屎緣合方便故火出五陰亦爾因此五陰生後

世五陰出非此五陰至後世亦不離此五陰得後世五陰五陰但從因緣出譬如穀子中芽出是子非芽亦非餘芽邊生非異非一得後世身亦爾譬如樹木有莖節枝葉花實得時節因緣花葉具足善惡行報亦復如是種子壞故非常非一芽莖葉等生故不斷不異死生相續亦復如是行者知諸法無常苦空無我自生自滅知因愛等有知因滅是盡知盡是道以四種知知十二分是正見道衆生爲縛著所誑如人有無價寶珠不別其真爲他欺誑是時菩薩發大悲心我當作佛以正真法化彼衆生令見正道問曰如

摩訶衍般若波羅密中言諸法不生不滅空無所有一相無相是名正見云何言無常等觀名爲正見答曰若摩訶衍中說諸法空無相云何言無常苦空等不實若言不生不滅空是實相者不應言無相汝言前後不相應復次佛說四顛倒無常中常顛倒亦有道理一切有爲無常何以故因緣生故無常因無常緣所生果云何常先無而今有已有便無一切衆生皆見無常內有老病死外見萬物彫落云何言無常不實問曰我不言有常爲實無常爲不實我言有常無常俱是不實何以故佛言空中有常無常二事不

可得若著此二事是俱顛倒答曰汝言不與法相應
何以故言無法云何復言二俱顛倒一切空無所有
是爲實不顛倒若我破有常著無常我法應破而不
實我有常顛倒破故觀無常何以故無常力能破有
常如毒能破餘毒如藥除病藥亦俱去當知藥妙能
除病故若藥不去後藥爲病此亦如是若無常法著
應當破不實故我不受無常法云何破佛言四真諦
中言實苦誰能使藥苦因是實因誰能令非因苦盡
是實盡誰能令不盡盡道是實道誰能令非道如日
或可令冷月或可令熱風可令不動是四真諦終不

可動轉汝於摩訶衍中不能了但著言聲摩訶衍中
諸法實相實相不可破無有作者若可破可作此非
摩訶衍如月初生一日二日其生時甚微細有明眼
人能見指視不見者此不見人但視其指而迷於月
明者語言癡人何以但視我指指爲月緣指非彼月
汝亦如是言音非實相但假言表實理汝更著言聲
聞於實相行者若得如是正見觀十二分和合爲因
果二分果時十二分爲苦諦因時十二分爲集諦因
滅是盡諦見因果盡是道諦四種觀果無常苦空無
我四種觀因集因緣生問曰果有四種但名苦諦餘

者無諦名也答曰若言無常諦復疑苦諦亦疑無我
諦亦疑一種難處復次若言無常諦無咎空非我諦
亦無咎若無常苦空無我諦於說爲重故是故於四
說一問曰苦有何異相於三中獨得名答曰苦是一
切衆生所狀患衆生所怖畏無常不爾或有人爲苦
所逼思得無常無有欲得苦者問曰有人欲得捉刀
自殺針炙苦藥入賊如是種種非求苦也答曰非爲
欲得苦欲存大樂畏大苦故取死苦爲第一患樂爲
第一利以是故離苦實得快樂是故佛以果分獨名
苦諦非無常空無我諦是於四諦中了了實智慧不

疑不悔是名正見思惟是事種種增益故是名正覺
除邪命攝四種邪語離餘四種邪語攝四種正語除
邪命攝身三種業除餘三種邪業名正業離餘種種
邪命是名正命如是觀時精進是正方便是事念不
散是名正念是事思惟不動是名正定正見如王七
事隨從是名道諦是事一心實信不動是名信根一
心精勤求道是名精進根一心念不忘失是名念根
心住一處亦不馳散是名定根思惟分別無常等覺
是名慧根是根增長得力是名五力問曰八正道中
皆說是名定等根力中何以重說答曰隨入行時初

得小利是時名爲根是五事增長得力是時得名爲力初入無漏見諦道中是功德名入正道入思惟道時名七覺意初入道中觀念身痛心法常一心念是名四念止如是得善法味四種精勤是名四正勤如是欲精進定慧初門勤精進求如意自在是名四神足雖名四念止四正勤四神足五根等皆攝隨行時初後少多行地緣各各得名譬如四大各各有四大但多得名若地種多水火風少處名爲地大水火風亦如是如是三十七品中各各有諸品如四念止中有四正勤四神足五根五力七覺八道等如是觀十

二分四諦行四念止四正勤四神足五根五力七覺意八正道其心安樂復以此法度脫衆生一心誓願精進求佛是時心中思惟觀念我了了觀知此道不應取證有二事力故未入涅槃一者大悲不捨衆生二者深知諸法實相諸心心數法從因緣生我今云何隨此不實當自思惟欲入深觀十二因緣知因緣是何法復更思惟是四種緣因緣次第緣緣緣增上緣五因爲因緣除過去現在阿羅漢最後心除過去現在心心數法是次第緣緣緣增上緣緣一切法復自思惟言若法先因緣中有則不應言是法因緣生

若無亦不應言因緣中生半有半無亦不應言因緣
生云何有因緣若法未生若過去心心數法失云何
能作次第緣若佛法中妙法無緣涅槃云何爲緣緣
若諸法實無性有法不可得若因緣果生因此有彼
是說則不然若因緣中各各別若和合一處是果不
可得云何因緣邊出果因緣中無果故若因緣中先
無果而出者何以不非因緣邊出果二俱無故果屬
因緣因緣邊出是因緣不自在屬餘因緣是果屬餘
因緣云何不自在因緣能生果是故果不從因緣有
亦不從非因緣有則爲非因果無故緣與非緣亦無
也問曰佛言十二因緣無明緣諸行汝云何言無因
果答曰先已答不應更難若難者更當答佛言眼因
色緣癡邊生邪憶念癡是無明是中無明何所依住
若依眼耶若色中耶若識中耶不應依眼住若依眼
住不應待色常應癡若依色住不應待眼是則外癡
何預我事若依識住識無色無對無觸無分無處無
明亦爾云何可住是故無明非內非外非兩中間不
從前世來亦不往後世非東西南北四維上下來無
有實法無明性爾了無明性則變爲明一一推之癡
不可得云何無明緣行如虛空不生不滅不有不盡

本性清淨無明亦如是不生不滅不有不盡本性清淨乃至生緣老死亦爾菩薩如是觀十二因緣知衆生虛誑繫在苦患易可度耳諸法若有實相難可得度思惟如是則破愚癡若菩薩心多思覺常念阿那波那入時出時數一乃至十五一心不令馳散菩薩從此門得一心除五蓋欲行菩薩見道應行三種忍法生忍柔順法忍無生忍云何生忍一切衆生或罵或打或殺種種惡事心不動轉不瞋不恚忍之而更慈悲此諸衆生求諸好事願一切得心不捨放是時漸漸得解諸法實相如氣熏著譬如慈母愛其赤子

乳哺養育種種不淨不以爲惡倍加憐念欲令得樂行者如是一切衆生作種種惡淨不淨行心不增減不退不轉復次十方無量衆生我一人應當悉度使得佛道心忍不退不悔不却不懈不貳不畏不難是生忍中一心繫念三種思惟不令外念外念諸緣攝之令還是名生忍云何柔順法忍菩薩既得生忍功德無量知是功德福報無常是時貳無常自求常福亦爲衆生求常住法一切諸法色無色法可見不可見法有對無對法有漏無漏有爲無爲上中下法求其實相實相云何非有常非無常非樂非不樂非空

非不空非有神非無神何以故非有常因緣生故先無今有故已有還無故是無非有常云何非無常業報不失故受外塵故因緣增長故是故非無常云何非樂新苦中生樂想故一切無常性故緣欲生故是故非樂云何非不樂有樂受故彼染生故求樂不惜身故是故非不樂云何非空內外入各各受了了故有非福報故一切衆生信故是故非空云何非不空和合等生故分別求不可得故心力轉故是故非不空云何非有神不自在故第七識界不可得故神相不可得故是故非有神云何非無神有後世故得解

脫故各各我心生不計餘處故是故非無神如是不生不滅不不生不不滅非有非無不受不著言說悉滅心行處斷如涅槃性是法實相於此法中信心清淨無滯無礙輒智輒信輒進是謂柔順法忍云何無生法忍如上實相法中智慧信進增長根利是名無生法忍譬如聲聞法中緩法頂法智慧信精進增長得忍法忍者忍涅槃忍無漏法故名爲忍新得新見故名爲忍法忍亦如是時解脫阿羅漢不得無生智增進廣利轉成不時解脫得無生智無生法忍亦如是未得菩薩果得無生法忍得菩薩具行果是名菩

薩道果是時得般舟般三昧於衆生中得大悲入般若波羅蜜門爾時諸佛便授其號隨生佛界中爲諸佛所念一切重罪薄薄者滅三惡道常生天上人中名不退轉到不動處末後肉身盡入法身中能作種種變化度脫一切衆生具足六度供養諸佛淨佛國土教化衆生立十地中功德成滿次第得阿耨多羅三藐三菩提爲菩薩禪法初門
行者定心求道時常當觀察時方便
若不得時無方便是應爲失不爲利
如犢未生犧牛乳乳不可得非時故